

# ILISÍKU ILI I LISÍMBO

## ILI LISISIMIKISÍGWE



Yaga itolo lululo, linga umwe mubagile, akabalilo kako uswe twinamisye imitu gyitu ku lisyu lya lwiputo.

<sup>2</sup> Gwempala Tata Gwakumwanya, uswe tukupalisya ikilo iki, ulusako ulungi ukwisa nukutwala iyalwimiko iyi, inswigisya i Nongwa ya Yeso Kristi. Uswe tukupalisya Ugwe panongwa yakuti Umwene akáli yuyo mmayolo, umwisyugu, na bwilanabwila. Uswe tukukupalisya Ugwe panongwa ya bandu aba aba bíbungénie panja apa nkabalilo ka butalalifu ubu, kangi pópe nu kugúlila kwābo ukukulumba, ukulondesya, ukwitika ukuti ikindikimo ikikinda-kyabwila kikupigwaga kwa uswe ukufuma kwa Kyala. Uswe tukwisa nu lusúbílo, Ntwa, ku lukomano lulilosa. Uswe tukupalisya Ugwe panongwa ya ndumbilili isi, ikilo ukukinda mmayolo, ku kitembe; ukupalisya Ugwe panongwa ya bulumbilili apa amayolo ga mmayolo, kangi panongwa ya bulumbilili umwisyugu, ku kitembe. Uswe tukugúlila lilino iki Ugwe kuyaga nakyo kuli uswe ikilo iki.

<sup>3</sup> Tāta, uswe tumenye ukuti aligwesa uyu abagilile ukwendesya ifiboko fyabo abagile ukusyumbutunya amani ga i Bangeli, loli alipo mwene Yumoywene Yuyo abagile ukulipela Ilyene liyege lyumi nukuya lyanaloliloli, kangi yula yo Ugwe. Kangi, Tāta, uswe tukukulondesya Ugwe ukubomba ikyo ikilo iki. Tusayaga uswe mu njila yiliyosa. Indumbula syitu siswíle nu buhofu akabalilo kako uswe tukukabona akabalilo kakusegelela akabalilo kako uswe tukwanaga nu Mwene, kisyo ku kisyo, Yuyo uswe tunganile nukummwitugasyila ifyinja fyosa ifi.

<sup>4</sup> Bingi abapinduke abapya, Ntwa, batendekígwe. Ukupilikisya ukuti ikilundilo ikinywamu, malongo mana pamo malongo mahano, bikosigwaga mu Ngamu Yāko, ndubunju, ukufuma ku bulumbilili bwa kilo kya mmayolo. O Kyala, nalamba kindililaga, uswe tukusuma, mpaka aligwesa umanyiligwengānila i Mbeyu ya Kyala yilubwene u Lumuli lwa Nongwainunu, kangi yisile nkibaga.

<sup>5</sup> Uswe tukukusuma Ugwe ukutufisa uswe ikilo iki kunyuma ku Lisyu; gogaga a maso gito ku findu fya nkisu, kangi unko uswe tumbonege Yeso. Paliyaga pala u ubwendelemo bwa Kyamba Kusanuka nkati mmyitu, ikilo iki, ukuti tulingambonaga u mundu aligwesa mwene yu Yeso mwene. Uswe tukusuma ikyene mu Ngamu Yāke, kangi panongwa ya lwimiko Lwake nu kulisimikisya kwa Nongwainunu Yāke. Amení.

Umwe mubagíle ukwitugasya.

<sup>6</sup> Une itolo ngusanusyaga ikyakuyobelapo iki, pamo imesa, itolo panandi kulubafu, linga ikyene kili kanunu, ukuti une mbagile ukuketa imbafu syosa-sibili isya kilundilo. Une ngusakikisya une mbagile ukubika ifyakuyobelapo ifi ukusyungutila apa bule. Umma ndaga, itolo a kabalilo.

<sup>7</sup> Uswe tukubaponia, ukufuma ku kyumba ikinwamu kuno ikilo iki, abinitu mu Arizona, California, Texas, kangi ukukilania United States, mu njila ya telefoni. Iki—ki kikubuka kukisu-kyosa, u bulumbilili ubu ikilo iki, mu njila ya telefoni, polelo uswe tukusubila ukuti Kyala ikutusayaga uswe.

<sup>8</sup> Ngimba umwe mubagile ukupilika, kunyuma kubwa ku—ku kyumba ku kīmama? Umma ndaga, abene bikuketesyaga lilino lino ingungilo ya telefoni, ukuketa linga iyene yikubomba imbombo mosa kanunu.

<sup>9</sup> Aligwesa ahobwike ikilo iki? [Ikilundilo kikuyoba, “Ameni.”—Nsimbi.] Yoba, ikyo kyo kinunu! Pa lubafu *ulu*? [“Ameni.”] Ameni. Une nsangalwike fiyo ukuketa ukuti umwe mwesa mwitugesye kanunu.

<sup>10</sup> Kangi kilabo nkilo, linga ifilundilo fikukindilila ukwisula, apene pisakuyapo kangi i telefoni indalule. Yilipo apa ikilo iki. Une ngwinogona bamo mwa bene bali pási pala ku kitembe.

<sup>11</sup> Kangi, kilabo nkilo, ubulumbilili bukabāgila ukuyako ku kitembe, panongwa yakuti i . . . ikuyangako u gwamaluba kula ikumogesya ikipanga ku bwegi kilabo pamusi. Kangi abene basāmīsyē u—u bulumbilili, ndubunju, ukufyukila ku kipanga kya Nkundwe Ruddell, yumo mwa balilansi bitu, kangi pamwanya pa—pa nsebe unywamu apa, 62. Ngimba ikyene kifumusigwe? [Nkundwe Neville ikuyoba, “Ena.”—Nsimbi.] Ikyene kifumusigwe. Kangi, linga ikyene kikuyefukila kumwanya kuno, uswe twegaga bosa aba basyele nukubatuma undumbilili uyungi ukusulukila ku kya Nkundwe Junior Jackson, pási mu Clarksville. Inongwa iyi uswe twali nakyo ikyene ku kya Nkundwe Ruddell, ikyene kyo kifuki apa, kangi uswe tubagile . . . kangi uswe twinogonaga umwe mubagile ukukyaga ikyene kipepeko. Kangi polelo uswe tukupakikisya ikyene mu njila yimo. Kangi yaga nsisisimikisyi ukutwala syosa inyosyo isyo nkati kilabo, kangi une ngusubila bisakuyangapa abangi mia yumo pamo babili ku bala ku losyo kilabo. Kangi lilino kilabo nkilo . . .

<sup>12</sup> Une ngiganamo siku ukufumusya kalikosa ugwe kuyoba pankyeni pa kabalilo, loli ikilo kimo mu bubombelo, pamo i lisiku limo, une ngulonda ukuyoba pa kimanyilo kya: *Yo Ani Uyu Melkisedeki?* Panongwa yakuti, ikyene kyo—kyo kimanyisyo iki une ngwinogona uswe tukwitugasya nkati nkabalilo kāko isetuli isi, isi syo syāli lyo lilālúsyo ukukinda ingulilo, isya, “Yo ani u Mwinitu uyu?” Kangi une ngwitika ukuti Kyala ali ni lyamulo,

Uyu Umwene āli. Bamo balinkuti, “u buputi,” bamo balinkuti, “u mwalafyale,” bamo. . . Loli pabagīle ukuyapo. . .

<sup>13</sup> Akabalilo kako lilipo ililālúsyo, libagīle ukuyapo i lyāmulo ku lilālúsyo lila, ili lyākutalusya. Kukabagila ukuyako i lilālúsyo kisita ikyākwanda ukuyako i lyāmulo.

<sup>14</sup> Lilino, uswe tukusubila ukuti Kyala ikutupaga uswe ulusayo ikilo iki ukufuma mu Lisyu Lyāke, bo uswe tukubala Ilyene.

<sup>15</sup> Kangi umwene mufumile ukuya. . . Billy āmbulīle une ukuti mbabule umwe ukuti umwe naloliloli muli nakyo ukukolelana na bandu aba kuno, aba bāli mu lubatiko lwa magali, abasikali na filifyosa. Kindililaga; ikyo kyo fiyo, fiyo kinunu.

<sup>16</sup> Uswe tukusubila ukukéta akabalilo, lumo mu nkyeni, akabalilo kāko lumo uswe tubagile ukutwala ikihema nkaya nukikibika muno mu lubingilo lwa mpila, kūko uswe tubagīle ukwitugasya ku butali bwa kabalilo, lumo ku milungu mitatu pamo mina, ukusania, ukumilisa. Kangi apa uswe itolo tukufika kifuki ukumanyana yumo ku nnine, kango polelo uswe tukufimbilisigwa ukuyoba mwende-kanunu kangi uswe tukubuka kangi. Loli une ngulonda ukwisa nukwitugasya ubwendelo ubutali, akabalilo kamo kūko ugwe ubagīle ukwitugasya ukuti uswe tungafimbilisigwaga ukwigala mu kilo kimo pamo fibili, loli itolo ukwitugasya nu kumanyisa, pamusi na pakilo, pamusi na pakilo, ukubuka nu kubuka. Lumo yumo ikubuka ku kāya nukwakulyesya inguku, ukukama ing’ombe, kangi ukugomokela undungu unkonge nukukindilila nu bubombelo. Une—une nkiganīle ikyo. Polelo u Ntwa ayege na umwe.

<sup>17</sup> Lilino, bo une ngāli ngasōkapo, lumo pa Ndungu kulubunju pamo Ndungu nkilo, pamo akabalilo kamo, lumo mwa ngomano isi, une mmenye umwe mukugūlila ukupilika i Ndumi pa Bwanaloli bwa *Bwegi Nu Kusōka*, iki kyo kimo mwa ndamyo ingulumba isya lisiku. Kangi une itolo ndisisimikisiyo mumo une nimīle apa, une ngwitika ukuti i lyāmulo ilitalusye lili mu Lisyu lya Kyala, kangi une ngwitika ukuti ikyo kyo une nāfingile ukugomokela ukubomba.

<sup>18</sup> Kangi une ngusakikisa, nubumanyi, mumo une mmanyile, une ngulonda ukuya nabo ubulumbilili muno mu Jeffersonville, pa Ndungu gwa Paska, kangi uswe twisa. . . ku bulumbilili bwa bukya bwa lisuba, kangi polelo Ndungu gwa Paska. Polelo uswe twisakufumusya ikylene pankyeni nukugela lumo ukwaga ikyumba, linga fikuti fibagīle, pamo ku buyo bumo, pa Ndungu, lumo ukwisa pa Mpyagilo na pa Ndungu. Ngufimbilisigwa ukwisa pa ndege nukugomokela, panongwa akene kasegelīle kabalilo. . . Une ngufimbilisigwa ukukétesya ikylene, ni mbātiko isi une ndinasyo, kangi kimo mwa fyangu—fyangu—fyangi ifyakufikako mu California. Kangi polelo, nakalinga itolo ukufuma apo, une ngufimbilisigwa ukubuka pāsi nkati ku—

ku Africa. Poleli umilisyaga ukuya mbukolelelano kangu twiputilaga uswe.

<sup>19</sup> Lilino, ikilo iki, une ngulonda ukukōlela ku bupilikisyo bwinu ku kayabo ka Lisyu lya Kyala, lyāgigwe mu ntu gwa 4 gwa Mwikemo Luka. Untu gwa 4 kangu ilinandi lya 16, ilyene lisakwanda, Yeso ikuyoba.

*...Ilisiku ili lyo i Lisyu ili lisisimikisigwe mu mbulukutu syinu.*

<sup>20</sup> Lilino uswe tukulonda ukukwaba, ukufuma Kula, ukutumula inongwa ukwa mūmo i Lisyu lya Kyala lyo lyalwendelo! Lilino, uswe twesa tubagile ukwinogonela indendeko, loli ikylene kikwegela i Nyendelo ukupela Ilyene libombe imbombo.

<sup>21</sup> Uswe tubagile ukwinogonela mosa mumo ulutendeko lwa makina, iligali, loli polelo ikylene kikwegela ulwendelo ukupela ingombelo uku ukubomba imbombo nu kwenda.

<sup>22</sup> Lilino, Yeso āgomokile ku—ku Nazareti, kūko Umwene ākulile. Ukukindilila mu Masimbo apa, uswe tukwaga ukuti abene bāyobile, “Uswe twāpilike Ugwe gwābombile *ikyakuti-ni-kyakuti* kula ku Kapernaum. Lilino unko uswe tukubone Ugwe kubomba ikylene kuno muno nkisu Kyake Kyene.”

<sup>23</sup> Yeso alinkuti, “U—u nsololi akaya nsita luyindiko mwene nkisu kyake kyene.” Kangu, ena, kula ko kūko ugwe ukūlile, kangu kūko abandu bakumenye ugwe. Kangu kūko Umwene āli ni—ni—ni ngamu imbibi, ukwanda itolo, ukuti Umwene ukuya āpāpīgwe kisita tāta gwapakisu. Abene balinkukolela Umwene “u mwana unsigwana,” ukuti Mariya āli ni kifuga bo akāli nu kwegigwa, pabwelu, kwa Yosefu. Loli, ikyo kyo kikaya ulu mma, uswe tumenye ikylene kikaya ulu mma.

<sup>24</sup> Kangu pa Lisimbo ili, iki kyāli nsongile une ukugwisya a māso gangu pa iki, kyāli kindukimo iki kyābombīgwe itolo lululu mu Phoenix, Arizona. Ilyene lyāli lisiku lyabumalikisyo, ulwa bulumbilili ubu une nābagile ukuyoba ku Lukomano-lukulumba Ulwakisukyosa ulwa Full Gospel Business Men.

<sup>25</sup> Kangu mu lukomano-lukulumba ālipo unjati na uswe, uyu āli bishopu gwa Katolika, uyu yo—yo gwa “Inyiho sya Chaldea ugwa kipanga kya Katolika gwa Bapostoli; u Njindikigwa—fiyo Rev. John S. Stanley, O.S.D.” Umwene yo “bishopu unkulumba ugwa kaya-kanywamu ka United States,” mu kipanga kya Katolika. *Iki* yilinkuya kādi yake kangu yake—yake adiresi.

<sup>26</sup> Kangu umwene āli njāti na ba Christian Business Men, kangu une nālimbwene umwene kula, i lisiku ilitasi. Kangu akabalilo kāko une nāyobaga pa kilo kya Mpyagilo, une ngusubila ikylene kyāli, pamo Mpyagilo kulubunju ku fyakulya-lembusya, kangu une. . . Bo une nguyoba, umwene alinkumilisa ukungētésya une. Une ndinkwinogona, “U nnyambala yula

naloliloli ikulwana na fyosa ifi une nguyoba.” Kangi, umwe mumenye, ugwe gwābagile—gwābagile itolo ukumbona umwene; umwene alinkūmilisya untu gwāke mmwanya-na-pási, loli une ngāménye iki katikati kyābombaga pa mwene.

<sup>27</sup> Polelo pa Ndungu pamusi, bo une ndiknkufika ukuyoba, une nābukága ukwega isimbo pa *Ukubaba kwa Kupāpa*, pāpo Yeso āyobíle, ukuti, “Bo mumo unkikulu mbubabe nu mwāna,” umwene ikubabigwa mu kupāpa. Kangi polelo une nāyága pakuyoba ukufuma pala, ukuya, *Ukubaba kwa Kupāpa*, ikimanyisyo, ukuyoba ukuti i kisu kili mu kubaba kwa kupāpa lilino. Ifyaiyolo fikufimbilisigwa ukutāgígwa, ukuti ifipya fibagile ukupāpígwa; bo itolo i—i mbeyu yikufimbilisigwa ukubola, ukuti yípe u bumi ubupya.

<sup>28</sup> Kangi mumo umbabo, imbabo sya kupāpa syātikile i kisu! Mu Bwite Bwakisu Bwakwanda, umwene āli nu lubabo ulunyali, panongwa yakuti abene bāli ni mbepo isyapoizoni, na fyosa bo ifyo, isi kifuki syābagile ukōnánga i kisu. Kangi mu Bwite Bwakisu Bwakibili, umwene ātikile ubungi, ulubabo ulukafupo; abene bāli ni fibongotolamibwe, kangi yópe i bomu ya atomiki. Umwene akabagila ukwima ulubabo ulungi. Ni misinga igi ni findu umwisyugu, ubwite bumobwene ukongelelapo bukunsōpága umwe ukubuka mbwasi, kabuno umwene lilino isakutabuligwaga. Kangi kwisakuyapo i kisu ikipya. Ili Bangeli lyāyobíle apene pisakuyapo.

<sup>29</sup> Pási pa Ndumi ya nsololi aligwesa, Israeli āli nu lubabo lwa kupāpa, panongwa yakuti abasololi aba bisaga pa buyo ukufuma pápo abafundakyala na banyambala-baputi babíkága i kipanga mu bubumbe bwa lubatike. Polelo akabalilo kako abasololi bikwisa pa buyo na ISI SYO IKUTI UNTWA, abene bāsenyendaga ifipanga fila, kangi umwene āli nu lubabo lwa kupāpa. Kubumalikisyo, umwene āli ni mbabo sya kupāpa kubumalikisya pala mpaka umwene āpāpíle u Mwanundumiana gwa Nongwainunu, ili lyāli Lisyu Lyene lipelígwe mbili.

<sup>30</sup> Polelo i kipanga naloliloli kili mbubabe bwa kupāpa ikili iki, kangi, kubutwale bwa Mwanundumiana, Mwanundumiana gwa Kyala ukwisa kangi. Bosa aba bafundakyala bitu, syosa imbātíko syitu, fyosa ifipanga-fipaguke fyitu, fibolile mosa mulamula pási pa uswe. Polelo uswe tuli mu lubabo lwa kupāpa, kangi i Ndumi ukufuma kwa Kyala akabalilo kosa yikusōpa i kipanga mu lubabo ulusitopo, loli linga kakindilepo akabalilo umwe isakuponaga ukutwala u Nsingilígwa. Kila kisakutwala panja Yeso Kristi ku Nsingilígwa Gwāke.

<sup>31</sup> Kangi, polelo, ukwinogona u nnyambala uyu ātatikene na une fiyo. Akabalilo kāko une ngusumuka mmwanya ukuti njobe i Ndumi iyi, une nāsyumbutwisya i Bangeli lyangu, ukulyaga i lyani lila.

<sup>32</sup> Kangi u nkasi gwangu âfumile pakumbapo une i Bangeli ilipya, panongwa ya Krismasi. Ili Bangeli lyangu ilikulu lyo lifikile ifyinja kalongo na fihano, kangi i kindu kila kyâli itolo kifuki kilepukene ntuyabo. Amani gala, akabalilo kosa ilyene lyigukâga, ga pululukâga ukufumu mu lyene. Kangi, loli une nâmenye itolo kûko ukulyâga i Lisimbo, polelo une ngufunda kifuki ku i Bangeli lila. Kangi une itolo ndinkupimba ilipya ili, panongwa yakuti ilingi lila lyâbonekâga ukuya lilepukano fiyo, ukubuka nalyo ku kipanga.

<sup>33</sup> Kangi akabalilo kâko une nâlyandile ukusanusya kula mwa Mwikemo Yohani, kûko i Lisimbo lila likwagigwa, une ndinkwanda ukubala untu gwa 16, kangi ilinandi ili une nâlondesyaga likâlipo pala mma. Polelo une ndinkwinogona, “Kihesya!” Une ndinkusyumbutuka ku nyuma kangi; pôpe ilyene likâli pala mma.

<sup>34</sup> Kangi Nkundwe Jack Moore, ukufuma ku Shreveport, Louisiana, u mwinangu gwangu gwankifugato, umwene âlitugesye pala. Une ndinkuti, “Nkundwe Jack, ngimba lila litikwagigwa mwa Mwikemo Yohani 16?”

Umwene alinkuti, “Ena.”

<sup>35</sup> Kangi umputi gwa kiKatolika uyu alinkusumuka mmwanya ukufuma mu kikota kyâke, ukufuma kifuki mia yumo ugwa baputi bitugesye pa kigemo; alinkwenda ukukilania kwa une, ni misekekesye gyâke gyôsa ni fijasi ni fipingika, na fyosa bo ifyo, nu kufika palapala kifuki na une. Kangi umwene alinkuti, “Mwanundumiana gwangu, yaga mwimike. Kyala ikwitendekesya ukwenda.”

Une ndinkwinogona, “U bishopu gwa kiKatolika ukumbula isyo?”

Umwene alinkuti, “Bala ilyene ukufuma mwa Buku gwangu.”

<sup>36</sup> Kangi une ndinkubala i Lisimbo ukufuma mwa Buku gwâke, nu kwega isimbe nukukindilila, ndinkulumbilila u bulumbilili bwangu.

<sup>37</sup> Ukufuma pala, akabalilo kâko une nâmalisisye, umwene âsumwike mmwanya bo une nsôkilepo, kangi alinkuti, “Kilipo i kindu kimokyene kikufimbilisigwa ukuboneka. Ukufuma pala, i kipanga kikufimbilisigwa ukusôkamo nkinyanyasi iki ikylene kilimo, pamo uswe tukufimbilisigwa ukusôkamo ukufuma mu kinyanyasi i kipanga kilimo.” Polelo, kimo pamo ikingi.

<sup>38</sup> Kangi une nâli pa nsebwe gwangu ukubuka ku kâya, ukugomokela pâsi ku Tucson, amayolo gala. A bâna bilumbusyaga ukulonda i kisyesye, kangi une nâlimile ukukaga a kasyesye pa kalûka akanini. Kangi u nkasi gwangu alinkuti, “Bill, une ngâlimo sika gwalutende mbumi bwangu bosa, ukukukêta ugwe gwimile pamwanya pala kubunabuna

ukukinda i Bangeli lila.” Alinkuti, “Ngimba ikyene kikapele ugwe ulutende?”

<sup>39</sup> Une ndinkuti, “Umma.” Une ndinkuti, “Une nāmenye ilyene lyāli nkati mula pabuyobumo. Abene itolo bakāli nalyo i lyāni mula. Ilyene lyo bubindikisya-busobi.”

<sup>40</sup> Kangi umwene alinkuti, “Ukwinogona, ukuti nakugūlile ugwe i Bangeli lila! Fyabonekaga ngati ikisige kilikyosa nkati mula kyāli pa une.”

<sup>41</sup> Kangi une ndinkuti, “Ena, ugwe ukabāgīle ukukitula kila. Ikyene kyāli bubindikisye-busobi mwi Bangeli.” Une ndinkuti, “Abene itolo bakābikilēmo i lyāni lila mula.”

<sup>42</sup> Ena, une ndinkubukamo nukukéta ku lyene kangi, itolo nubupelelesye mumo ilyene lyabāgīle ukuya; loli untu gwa 16 gikumalika, kiyabo, ikiyabo kya ugwe itolo ukufwana ma inchi matatu ukufuma pāsi, ukufyuka ku ntu gwa 17 pa lubafu ulungi, likubomba ikindu kilakila. Kangi, ukuya i Bangeli lipya, amāni mabili gala gamatililene nubupelelesye palikimo, kangi Une nabalaga mu ntu gwa 17 mbuyo bwa gwa 16. “Ena,” une ndinkuti, “ikyō kyo kinunu. Ikyene kyo nongwayimo.”

<sup>43</sup> Kangi itolo nubununu ubu ugwe ubagīle ukupilika i lisyu lililyosa, i Lisyu likwisa kwa une, kangi lilinkuti, “Umwene ālingīle mu Nazareti, kūko Umwene ākusigwe; kangi alinkubuka mu sinagogi, mumo ulwene lwāli lwiho Lwāke. Kangi u mpūti ālīmpéle Umwene a Msimbo ukubala, kangi Umwene ikubala Yesaya 61. Kangi akabalilo kāko Umwene ābalīle a Masimbo, Umwene alinkwitugasya pāsi; ukumpapo u mpūti kugomokesya i Bangeli, u Būku, nukwitugasya pāsi. Kangi ifisige fyosa ifya kilundilo fyāli pa Mwene. Kangi a Masyu amapala galinkusōka ukufuma pa kanwa Pāke. Kangi Umwene alinkuti, ‘Ilisiku ili i Lisimbo ili lisisimikisigwe.’”

“Ilisiku ili i Lisimbo ili lisisimikisigwe.”

<sup>44</sup> Mumo likutalusyila i Lisimbo! Linga ugwe kwisa kukētēsya iki mwa Yesay 61:1 ukufika 2, po apa u Ntwa gwitu ābalaga ukufumila, Yesaya 61:1 ukufika 2. Loli pakati pa linandi lya 2 ilya Yesaya 61, Umwene alinkwima. Pāpo ilyene lyātīle, “U Mbepo gwa Ntwa ali pa Une; ukulumbilila ikyinja ikyitikisigwe,” polelo Umwene alinkwima. Nongwa ya fiki? Ikiyabo ikingi, ukutwala u bulongi, kikabombaga imbombo ku bwise Bwāke ubwakwanda, loli u Bwise Bwāke ubwakibili. Muketile, ilyene likābombīle imbombo pala. Mumo a Masimbo gatikubombamo siku ubusobi! Agene akabalilo kosa go mapelelesye. Yeso alinkwima itolo pāpo i Lisimbo lyālimīle, nongwa yakuti ikyō kyo katikati iki kyāli pakusisimikisigwa mu lisiku Lyake, lilino, mu bwise bula ubwakwanda. U Kwisa kwa kibili Umwene isakutwalaga u bulongi pa kisu; loli komma akabalilo kala. Umwene āyaga “pakulumbilila ikyinja ikyitikisigwe.”

45 Kētésya u Mesiya imile pa kigemo, ukwilingania Mwene ni Lisyu Iya lufingo ku ngulilo. Kyo kihesyanki, u Mesiya imile pa nkyeni pa kipanga! Kangi kéta a Masyu amapala aga, akabalilo kâko Umwene ikuyoba apa, “Ukulumbilila ikyinja ikyitikisigwe.”

46 “Ikyinja ikyitikisigwe,” mumo uswe twesa tukumanyila, ukuya bafunda i Bangeli, kyâli “kyinja kya malongo mahano.” Kila, akabalilo kâko abatumwa na bamminyololo, mu abene bāyilîle, bālyegîgwe, mminyololo; kangi balinkufimbilisigwa ukupa u mwanundumiana, ukuhomba ikimeleligwa; pamo u mwanundindwana, ukuhomba ikimeleligwa, [Ubuyo busitakandu pa tepi—Nsimbi.] kangi abene bāli mbupinyigwa. Kali ko kabalilo katali kaki abene bāli mbupinyigwa, pamo kali kabalilo katali bule avene babagilîle ukwitugasya kula; akabalilo kako ikyinja kikwisa, ikya malongo-mahano, akabalilo kâko ingangabwite yākubaga, u mundu aligwesa abāgîle ukubuka mbwabuke linga umwene ālondaga ukubuka mbwabuke. [Ubuyo busita kandu pa tepi.] Ugwe uli mmwabuke. Ugwe ukāli ntumwa kangi mma.

47 Loli linga ugwe gwalondaga ukusyāla ntumwa, polelo ugwa gwafimbiligwaga ukubuka kula ku tempeli, ukwima pa mbanda ya tempeli, kangi abene begaga u lūbo nukutobola ikibwina mu mbulukutu yāke, kangi polelo ugwe gwafimbilisigwaga ukumbombela u fundi-gwa-batumwa amasiku gosa aga gasyele pa bumi.

48 Kyo kyakwegelela kiki ikyene kili ikya Nongwainunu ya Yeso Kristi! Akabalilo kâko Ilyene lilumbililîgwe, akabalilo akitikisigwe, kangi akabalilo ka Kyinja-malongo-mahano; aligwesa, kali ugwe gwe yo ani, yo langinki ugwe guli, kyo kipanga-kipaguke kiki ugwe kubukako, kubutuli kuki ugwe gwineme mbutulwanongwa, pamo fiki ifi fitamisyé na ugwe; ugwe ubagile ukubuka mbwābūke akabalilo kâko ugwe kupilika akogo ka ngangabwite ya Nongwaininu panja. Ugwe uli mwābūke!

49 Loli linga ugwe kusanuka inyuma pa Ndumi nukupîka ukupilika Iyene, kētésya, ugwe gwatoboligwaga i mbulukutu, nu lūbo. Ikyo kikusanusya, ukuyoba, ukuti ugwe ukilénie u lukindi pakati pa ipyana nu bulongi, kangi ugwe utisakupilikamo siku i Nongwainunu kangi. Ugwe utisakukindilamo kangi siku. Ugwe kufimbilisigwa ukuya ntumwa ku bubombelo ubu ugwe ulimo, amasiku aga gasyele aga bumi bwāko, linga ugwe kupîka ukupilika ikyinja ikyitikisigwe.

50 Lilino, ikiyabo ikingi ikya ikyene, mumo une nāyobile, kakālondigwāga ukwamuligwa, panongwa yakuti u Mesiya uyu isaga, akabalilo lilino, ko kabalilo kako Umwene ikutwalaga u bulongi.



51 Lilino, bulebule abandu bala bābagile ukutoligwa ukumbona ukuti Ywani Umwene āli? Bulebule abene bakipondilwemo siku ikyene? Bulebule ikyene kyābagile ukuya, akabalilo kāko ikyene naloli pabwelu kyātendekigwe ukumanyigwa nukunangisigwa? Bulebule abene bābagile ukukipondwa ukukibona ikyene? Akabalilo kāko Umwene . . .

52 Lyo Lisyu liki! Inogona isya ikyene, “Ilisiku ili lyo i Lisimbo ili lisisimikisigwe pankyeni pa maso ginu.” Ywani āyobile ikyene? Kyala Mwene, Uyu yo nsanusi gwa Lisyu Lyake Lyene. “Ilisiku ili lyo i Lisimbo ili lisisimikisigwe.” U Mesiya, Mwene, imile mu kuyapo kya kilundilo nukubala i Lisyu ukufuma mu i Bangeli, ukufwana nu Mwene, kangi polelo ikuyoba, “Umwisyugu i Lisimbo ili lyo lisisimikisigwe,” kangi abene pópe bātologwe ukulibona Ilyene.

53 Yo sokanki iyi yibagile ukuya, loli ikyene kibonike. Ikyene kibonike utubalilo twingi. Ikyene kyabagile ukuboneka bulebule? Ena, mumo ikyene kyābombile ntubalilo utungi, ukwisila ukwitika mu ndinganio sya mundu isya Lisyu. Ikyo kyo iki kyālyandísye ikyene. Abitiki bala mmasiku gala, abitiki abakoleligwa-lulo, bēgaga indinganisyo sya iki u mpūti āyobile ukufwana ni Lisimbo. Polelo Yeso, ukusita ukuya yumo mwa bene pamo ifibugutila fyabo, Umwene alinkutagigwa ukufuma mu bulilansi bwābo.

54 Kangi, polelo, abene balinkutoligwa ukulinganisya Umwene na bēne, panongwa yakuti Umwene āli nkindane ku bene. U Mundu gwa Yeso Kristi āli nkindane fiyo mpaka nayumo akābagile ukupondwa ukukéta ukuti kila āli yo Mwanundumiana gwa Kyala, panongwa yakuti Umwene āli ukulingania ukupelesye kwa Lisimbo ili lyālisimbigwe isya Mwene.

55 Iyo yo njila iyi u Nkristi aligwesa ikumanyigwa, akabalilo kāko u bumi bwāke bukulingania i findu filafila ifi u Nkristi abagisenie ukubomba.

56 Mumo Umwene ābagile ukwima pala nukuyoba, “Ilisiku ili i Lisimbo ili lisisimikisigwe pankyeni pa masi ginu!” Mumo kiyilile pakyene, mumo kiyilile pabwelu fiyo, kangu pópe abandu bala balinkusitakupilikisya. Nongwa ya fiki? Yo nongwa yakuti abene bālyegile ubulinganie ubwa lubatiko lumo ulwa bapūti aba abene bapilikila ngako.

57 Kangi isyambukulu akabalilo kosa sikwiyandisya syene. Kangi i Lisimbo lili nu kusanusya kwa pabili-pabili ku Lyene, nu busetuli bwa pabili-pabili.

58 Ku kwegelela itolo, bo mumo ilyebe likuyobela mwi Bangeli, ukuti, “Ukufuma mu Igupto Une ngōlile u mwanundumiana Gwangu,” ukuyoba isya Yeso. Bopa pa lubafu pa ilyo, kangi ugwe kwisakusyaganiaga, lyópe likyoba isya Yakōbe, i Lisimbo lilalila. Yeso āli Mwanundumiana Gwāke ungulumbapo. Yakōbe

āli mwanundumiana Gwāke uyu Umwene ālinkōlile ukusōka mu Igupto, iki utusimbilo twa Scofield nu tusimbilo tosa utungi tukupa ku lyene, panongwa yakuti ikyo kyo i Lisimbo lyayobelaga ngako. Poleli ilyene lyāli nu—nu lyamulo lyapabili; ilyene lyāli ni lyamulo kwa Yakōbe akōlelígwe panja, kangi kwa Yeso akōlelígwe panja.

<sup>59</sup> Kangi polelo momumo kuyilile umwisyugu! Nongwa yakuti uswe tuli mbutolwe bumo mumo uswe tuyilile, kangi abandu bikutoligwa ukububona u Bwanaloli bwa Kyala, yo nongwa yakuti bulipo ubulinganie ubupeligwa-nu-mundu bwingi fiyo ubwa Lisyu lya Kyala. Kyala atikulondigwa na yumoywene ukulingania i Lisyu Lyake. Umwene yo ndinganí Gwa Yuyo Mwene.

<sup>60</sup> Kyala ātile, kubwandilo, “Unko kuyeko ubwelu,” kangi kulinkuyako ubwelu. Ikyo kitikulondigwa ubulinganio mma.

<sup>61</sup> Umwene alinkuti, “Umfunde isakuyaga ni kifuba,” kangi umwene alinkuya. Ikyo kikalondigwaga ululinganio lulilosa mma.

<sup>62</sup> Bo . . . Ukulingania kwa Kyala ukwa Lisyu Lyāke ko kabalilo kāko Umwene ikusisimikisya nukubikela ubuketi Ilyene ukuya lyo lilyo. Uko ku kulingania Kwāke, ukwisila kukupela Ilyene ukwisa nukuyako. Uko ko kūko ubulinganie bwa Kyala buli, ko kabalilo kāko Umwene ikupela i Lisyu Lyāke ukwisa ukuyako. Umwene ikulingania Ilyene kwa umwe.

<sup>63</sup> Bo linga kukālímó ubwelu siku, kangi Umwene ātile, “Unko kuyeko u bwelu,” kangi bulinkuyako, kila kitikulondigwa yumo aligwesa ukulingania.

<sup>64</sup> Loli uswe tukwega ifipanganio ifipeligwa-nu-mundu ukōnganiamo mu Lyene, kangi, akabalilo kāko ugwe kubomba, ugwe—ugwe kulibika Ilyene ukusōkapo pa lukindi. Ikyene akabalilo kosa kyāli njila yila.

<sup>65</sup> Loli une ngāli ngwinogona isya mumo kyākutika ikylene kyabagisenie ukuya. Inogona isya ikylene, u Mesiya! Nongwa ya fiki abene bātólígwe ukumbona Umwene? Panongwa yakuti, abalongosi bābo balabala aba bābagisénie ukummanya Umwene, aba bābagisénie ukwisibila mu Lisimbo, aba bābagisénie ukuya bapilikisyaga isya Masimbo, abene balinkunjufya u Nnyambala uyu nukuti, “Umwene yo mwāna nsigwana, uku—uku ukwanda itolo. Uswe tukābagile ukwitika Ikyo.”

<sup>66</sup> Ifyinja fingi pankyeni, uswe tutikwitika kila. Uswe tubagile ukufwa ku nongwa ya kuyoba ukuti Umwene āli Mwanundumiana umpāpígwe-munfunde.

<sup>67</sup> Kangi ikylene kikwisa ukuboneka i lisiku limo ukuti, fifindu ifi uswe tukukéta Yehova ikubomba umwisyugu, abanyambala mu ngulilo isi sikwisa, linga iyene yiliko,

bisakufwaga ku kindu iki uswe tukuyobapo umwisyugu. Umwe mwisakufimbilisigwaga ukubomba ikyene akabalilo kâko ubungw'ale bwa kinyamana bukwisa, kangi umwe mutikwitikisigwa ukulumbilila i Nongwainun injila iyi. Akabalilo kâko ulubunganio ulukulumba ulwa fipanga fikwisa palikimo, iki kyo lubatiko lululu lino ku kipanga kya kisu, umwe mwisakufimbilisigwa ukumyatika ubuketi bwinu nu bumi bwinu bwene, ku Iki.

<sup>68</sup> Umwe mukufimbilisigwa ukwitika Ilyene lilino. Linga abapūti bala bikufyuka mmwanya, aba balintobisye Yeso, āngali bakantobesya Umwene. “Loli,” ugwe kuyoba, “linga une nālīko kula, une āngali mbombile *ikyakuti-ni-kyakuti*.” Ena, yila yikāli ngulilo yako mma. Loli, iyi yo ngulilo yāko, aka ko kabalilo kâko.

Ugwe kuyoba, “Mulimosa, linga Umwene ali apa!”

<sup>69</sup> Ili Bangeli lyāyobile, “Umwene yo yulayula mmayolo, umwisyugu, na bwilanabwila,” yulayula, polelo Umwene ali apa. Loli, Umwene ali apa. Akabalilo kâko i kisu kisile ukuya kigufu, ukwisa ukuya kikulumbapo, kangi ukuya bamanyipo, Umwene ali apa mbubumbe bwa Mbepo, uyu abene bakabagila ukugoga pamo ukubika mbufwe. Umwene āfwile kamokene; Umwene akabagile ukufwa kangi. Umwene alinkufimbilisigwa ukupeligwa mbili ukuti Kyala abikigwe ku bufwe nu mbili, panongwa ya butulwanongwa. Loli akabalilo aka Umwene akābagilēmo siku ukufwa; Ikyene yo Mbepo Mwikemo.

<sup>70</sup> Lilino, ukwinogona bulebule ukuti abene bāli ni findu fila ukulwana nu Mwene! Ikindu ikingi, ukuti Umwene akālīngilēmo mfipanga fyabo filifyosa. Polelo, umwe muketile, ikyo pópe kyalimpelīle Umwene ukuya mundu umbibi. Umwene alinkusita ukwingila ifyabp—ifyabo ifibugutila, alinkusita kwingilamo mbupūti bwabo, kangi Umwene akalinako nakamo akakubomba nu lwene mulimosa. Kangi polelo, palubafu pa fyosa fila, Umwene āgelīle ukubongotola iki abene bāyengīle.

<sup>71</sup> Umwene ābukīle ku tempeli. Uswe tukunkōlela Umwene u Nnyambala umololo; Umwe āli, loli utubalilo twingi uswe tutikupilikisya iki ubōlōlo buli.

<sup>72</sup> Umwene āli Nnyambala gwa kibabīlisi, loli pópe uswe tukutoligwa utubalilotumo ukupilikisya iki i kibabīlisi kili. Komma ukupelela-ikisa kwābūndu mma, kukaya kibabīlisi mma. Loli, i *kibabīlisi* ko “kubomba u bwigane bwa Kyala.”

<sup>73</sup> Umwene alinkukinda pa kitubwi kya—kya Bethesda, i kipata. Pala bālambalele abandu, ifilundilo fya bene. Ifilundilo mu mbalilo insitakusisimikisigwa. Loli pala pālambalēle ifilundilo: abalemale, abafwamaso, abasitakwenda, abafotano. Kangi Umwene āli ni kibabīlisi pa bandu, akabalilo kosa. Kangi Umwene ābukīle ku mundu yumoywene uyu akāli ndemale, mfwamaso, nsitakwenda pamo mfofano; lumo umwene

āli nu lutamio lwa kubunyambala, pamo umwene āli na kanini akabonywafu aka kagomokile nyuma. Umwene āli na kēne ifyinja malongo matatu na lwele. Akene kakābukaga ukuntumia umwene, kakābukaga ukungoga umwene. Umwene ālambaléle pa katala. Kangi Umwene alinkuti, “Ngimba ugwe kwisatendekigwaga ukuya mbumbuluke?”

<sup>74</sup> Kangi u nnyambala alinkuti, “Une ngaya nayo nayumo ugwakumbika une mmisi, loli akabalilo kāko une ngwisa, ena, yumo ikunyelelāmo mula pankyeni pa une.” Muketile, umwene ābagīle ukwenda, umwene ābagīle ukukéta, umwene ābagīle ukufika ukusyungutila, loli umwene āli itolo monywa.

<sup>75</sup> Kangi Yeso alinkuti ku mwene, “Fyuka mmwanya. Ega ikitala kyāko kangi bukaga ku nyumba yāko.” Kangi Yeso ālalusigwe pa ikyo, kabuno umwe mukukumbukila i Lisimbo lyāyobille iki.

<sup>76</sup> Yo nongwa! Linga Umwene ābagīle ukwisa ku Jeffersonville ikilo iki nukubomba ulukino bo lula, abene pópe āngali bikuyoba isya Umwene.

<sup>77</sup> Loli, kumbukilaga, Umwene ālisīle ukubomba ikindu kimokyene, bwāli bwigane bwa Kyalā. Lilino, ikyo kikwagigwa mwa Mwikemo Yohano 5:19, ugwe kwisakwaga i lyamulo. Umwene alinkuti, “Naloliloli, naloliloli, une nguyoba kwa umwe, u Mwanundumiana abāgīle ukubomba nakimo mwa Mwene; loli iki Umwene ikuketa u Tata ikubomba, kila ikubomba u Mwanundumiana.”

<sup>78</sup> Lilino, abene babāgisénie ukumanya ukuti ikyo kyāli kikisisimikisye kilakila ikya busōloli bwa Mōse, “Kabuno u Ntwa Kyalā gwinu isakufyusyaga u Nsololi afwanikisigwe bo une.”

<sup>79</sup> Ngimba umwe mukētesisye, akabalilo Umwene ālimbwene u nnyambala, Umwene alinkuti. . . Yeso āmenye ukuti umwene āli mbwitugasye bula ku fyinja fingi. Muketile, ukuya Nsololi, Umwene ālimbwene u nnyambala yula mbwitugasye bula; nukubuka pási pala nukubīngi—ukubīnga injila Yāke ukusyungutila ukukinda abandu bala, ukunyātúka ukukinda ikilundilo, mpaka Umwene ālimmwagīle u mundu yula unsisimikisigwe.

<sup>80</sup> Ukukilania abalemale, abasitakwenda, abafwamaso, kangi abafotano, loli u Nnyambala iswile ni kibabīlisi. Loli, i *kibabīlisi* ko “kubomba u bwigane bwa Kyalā.”

<sup>81</sup> Lilino, uswe tukummwaga Umwene, pápo Umwene alinkusita kwingila na bene, Umwene akāli nakyō nakimo iyakubomba mfipanga fyābom polelo Umwene āli ntagigwa. Umwene akāli nako kalikosa. . .

<sup>82</sup> Palubafu pa ikyo, Umwene ābukīle ku tempeli i lisiku limo. U Nnyambala alinkubuku nkati mula nukwakwāga i

nyumba ya Kyala itolo kifuki yibwabuligwe mumo iyene yiyilile umwisyugu. Abene bulaga, bulisyaga, ukusanusya ihela. Kangi Umwene alinkusyumbutusya i mēsa isya hela; ukwega ingōye nukulukania isyene, nukubakoma abasanusyahela panja pa tempeli. Kangi ukubakēta abene nu bukalale, nukuti, “Ukwene kusimbígwe,” aleluya, “Inyumba ya Tāta yo nyumba ya lwiputo; kangi umwe muyipelile iyene mbako ya bahiyi. Kangi umwe, ni nyiho syinu, mupelile ingomelesyo sya Kyala ukuya nsitamaka.”

<sup>83</sup> O, ngimba ikubugutila kya luko lula kyabagilēmo ukwitika mwa Umwene? Umma, nkulumba. Abene bābungulwike-ni-ngulube akabalilo katāli fiyo mu ndipa sya fibugutila ni kinyanyasi ifya lisiku, mpaka abene bafikile fiyo ukukamandigwa nu bwakipanga mpaka abene balinkusita ukwipilika ukuseniyenda kwa Maka ga Kyala Mwenemaka. Yo nongwa u nkikulu unnini ābagile ukupalamasya u mwenda Gwāke nukubumbuluka ni Kyene; kangi u nsikali ungāle ābagile ukufunyila nkisyo Kyāke nukwipilika na maka nagamo! Kikwegele mumo ugwe kwisila ku Kyene. Kikwegela iki ugwe kulōndésya. Akabalilo kāko ugwe kubuka ku kipanga, ikyene kikwegela iki ugwe kulōndésya.

<sup>84</sup> Lilino uswe tukukēta Umwene imile pala. Kisita kwilamwa loli iki abandu bātalile bālinsokile umwene, bālinsokile... abapūti bābasokile abandu, “Lilino Umwene ikwisa kuno u Sabata uyu ikukonga, kangi, akabalilo kāko Umwene ikubomba, komma umwe ukumpilika Umwene. Lilino, umwe mubāgile ukubuka nukwitugasya kula, loli komma ukupa ulupilikisyo ku iki Umwene ikuyoba, panongwa yakuti Umwene akāya nkibugutila kyitu mma. Umwene yo ntāgigwa. Umwene akaya nayo i kadi ya ubulilansi. Umwene akaya ni kikalatasi kya kibugutila nakimo nu Mwene. Umwene akaya nakyō nakimo bo ikyo umma.”

“Ngimba Umwene yo fiki?”

<sup>85</sup> “Undumiana yumo unsambuke uyu āpapígwe pási apa, ubupāpígwe bwa busigwana, nkāya ka nkoma-matapwa, ukuti unna āmelíl’ulwanda lwa Mwene bo abene bakēgāna, kangi abene bāgelile ukufisa ikindu kila ni kindu ikikindafipeligwa kimo.

<sup>86</sup> “Uswe tumenye ukuti, akabalilo kāko u Mesiya ikwisa, Umwene isakusulukaga isulukilo sya ku Mwanya nukubuka ku mpūti gwitū unkulumba nukwakuyoba, ‘Apa Une ndipo, Kayafa.’” Loli uswe tukusyagania ukuti Umwene akābombile ikyene injila yila, panongwa yakuti ikyene kikāsimbígwe mu Lisyu injila yila. Ulwene lwāli lwiho lupeligwa-na-bandu uku lwalyāndile abene ukwitika ikyo.

<sup>87</sup> I Lisyu lyāyobile ukuti Umwene isakwisága itolo mu njila Umwene isile. Kangi pala Umwene ālimile, ukubala i Lisyu, nukuyoba ku bene, “Ilisiku ili i Lisimbo ili lisisimikisigwe

mmaso ginu.” Kangi pópe abene balinkutolígwa ukumbona Umwene pamo ukumwagania Umwene, mumo abene bábombíle mu ngulilo syosa isingi.

<sup>88</sup> Noa ábagíle ukuyoba i kindu kilakila, i lisiku ili umwene álingíle mu ngalaba kangi ikifigo kyáligalilígwe. Mōse ábagíle ukufyusya ilutūlo lila pamwanya pa ngalaba, ukukéta panja pa kilundilo . . . Kumbukilaga, Kyala áligéle i kifigo. Kangi umwene ábagíle ukuyoba, “Ilisiku ili i Lisimbo ili lisisimikisígwe mmaso mwinu,” Loli ukwene kwalilwíle fiyo ku bene akabalilo kala. Umwene álumbilíle ku fyinja mia yumo na malongo mabili, ukugela ukubegela abene mu bwato bula ubu umwene áyengíle, ukubabula abene ukuti i Lisimbo lyáyobile, “ISI SYO IKUTI U NTWA, ukwene kukutimaga i fula,” loli abene bágülíle akabalilo katáli. Loli Noa ábagíle mbupepe ukuyoba ukuti, “Umwisyugu, ilisiku ili, i Lisimbo lisisimikisígwe.”

<sup>89</sup> Mōse, i lisiku lilalila ili i Mbanda ya Moto yisile pa Kyamba Sinai nukupa ubuketi ku buyobelo bwake, Mōse ábagíle ukuyoba, “Ilisiku ili i Lisimbo ili lisisimikisígwe.”

<sup>90</sup> Mōse, umwe mumenye, áli nnyambala unkōlelígwe na Kyala, u nsololi. Kangi akabalilo káko umwene ákolelígwága, ukuya nsololi, umwene áfimbilisigwága ukuya nabo ubwendelo ubukindakipeligwa. Ukuti umwene áye nsololi, umwene alinkufimbilisigwa ukwanaga na Kyala kisyo ku kisyo nukuyoba nu Mwene. Kangi ikindu ikingi, iki umwene áyobile kyafimbilisigwága ukwisa nukuboneka, apo mma nayumo ángali ammwitike umwene.

<sup>91</sup> Polelo nu nnyambala nayumo ali nu bwabuke ukwikóléla mwe ikyakuti mpaka umwene áyobile kisyo na kisyo na Kyala, ku nyuma kwa lulangalanga ku buyobumo, kúko umwene ályagéne na Kyala, mwene. Kangi bosa abapíkakyala nkisú bákábagíle ukukilingania ikyene ukukisosyamo mwa umwene; umwene áli pala, umwene ámenye ikyene kyāboníke. U Nkristi aligwesa ikufimbilisigwa ukuya nu bwendelo bula bo abene bakáli nukuyoba kalikosa aka kuya Nkristi. Ubwenedo bwáko gwimwene!

<sup>92</sup> Une náyobilémo ku ntani gwangu, akabalilo aka kakindilepo, u ndumiana gwa kiKatolika unnini, uyu áyobile, “Mwipwa Bill, une mbopíle ukufuma ku mbanda ukubuka ku liyenge, ukubuka kulikosa, ukugela ukukyaga ikindu kimo.” Ikilo ukufuma kilo, bo u lukomano ulu lukanda, umwene ikukúta akabalilo kosa. Kangi akabalilo ka nkilo, umwene ikugogwa injosi isya kwingila muno, ukubopéla ku kigemo, kúko ukulumbilila, nukutendeka ukuláta ukuti umwene yo nsóbi.

<sup>93</sup> Une ndinkuti, “Melvin, kali kokūgu ugwe kugela ukubuka, fyo fipanga filinga ugwe kugela ukwingila, bo balinga aba ‘Mama Mariya,’ ugwe kuyobaga, pamo isayo silinga isi

ugwe kwegwa ukufuma ku nnyambala, ugwe kufimbilisígwa ukupâpi'gwa kâbubîli mwa Mbepo gwa Kyala. Ikyene kyo kindu kyene iki kisakwikutisya i ndumbula yâko.”

<sup>94</sup> Ikyo kyo, une mmenye abene bali nakyo ikyakupyanikisyapo, umwisyugu, pa kuya mpâpigwa kangî, itolo ponania amaboko nu ndumbilili kangî bîka i ngamu yâko mwa buku. Loli, binangu, ikyo kyo kimanyisyo. Ikyene kikaya mma Bwanaloli bwa i Bangeli. Linga ikyene kyâli, Imbombo sya Batumigwa, muntu gwa 2, ângali ikubala bo iki, “Bo i Lisiku lya Pentekosti lyafikîle nubwisusye, u ntimi alinkwenda panja nukuponia amaboko na bandu.”

<sup>95</sup> Loli lyâyobile, “Bo i Lisiku lya Pentekosti lyâlisile nubwisusye,” ku bwatilo bwa Kipanga, “kwâlisile akogo ukufuma ku Mwanya bo u mbelo ugwamaka umbopabopa, kangî ugwene gulinkwisula mosa mu nyumba mûmo abene bâlitugesye.” Mula momumo u Mbepo Mwikemo isile akabalilo kâkwanda. Umo momumo Ikyene kisile akabalilo kosa ukufuma akabalilo kala. Umwene yo Kyala, kangî atikusanukamo mma. Lilino, Ikyene kikubatabanua abandu.

Abene bikuyoba, “Kila kyâli kya lisiku ilingi.”

<sup>96</sup> Ena, Umwene yo yuyo mmayolo, umwisyugu, na bwîlanabwila. Akabalilo kalikosa i Kipanga kyâlimmwambibilîmo siku u Mbepo Mwikemo, Ikyene akabalilo kosa kikwisa bo lûlo Umwene âbombîle akabalilo kâkwanda, pâsi pa bulagili lulabula, Imbombo 2:38; siku fikasanukamo, siku fitisakusanukamo.

<sup>97</sup> Bo bubulagili bwa ngânga ku mbungo yimo. Umwene isakusima ubulagili ku mbungo yimo, u ngânga ikubomba. Kangî kwegwa ikyene ku gwamikota yumo unsitakumanyikigwa, kangî umwene ikubika mwingi fiyo unkemo mu gwene, ugwene gusululwike fiyo ugwe gutisakubombela ugwe nakimo ikununu; linga umwene ikubika mwingi fiyo u mwâfi mu gwene, ugwene kukugogâga ugwe. Ikyene kikufimbilisígwa ukusimbigwa itolo ukufwana nu ngânga.

<sup>98</sup> Kangî u bulagili bwa ngânga pa bwâmbibilîlo bwa Mbepo Mwikemo bo bupegigwe kwa uswe nu Ngânga Simoni Peteri, pa Lisiku lya Pentekosti. “Une ngubapaga umwe ubulagili. Pinduka, aligwesa gwa umwe, kangî yaga môsígwe mu Ngamu ya Yeso Kristi ku buswe bwa mbîbi syinu, kangî umwe mwisa kwambibililaga i kikungilwa kya Mbepo Mwikemo. Kabuno ubulagili buli kwa bene aba bali ku butali, kangî na kôpe ku ba baing aba u Ntwa Kyala gwitu isakubakôlêla.” U bulagili bwa Syepwa!

<sup>99</sup> Môse âli nu bwendelo ubu. Umwene âbukile pâsi nkati nkisu kangî umwene alinkwanda ukubabula a bandu, “Une nâlyagéne ni Mbanda ya Moto. Iyene yâli mu lusingi ulupyu. Kangî Umwene âlimbulîle une ukubabula umwe, ‘UNE YONE

UYU UNE YONE. Būka pási; Une ngwisa kuyaga na ugwe. Ega ingili iyi yili nkiboko kyāko kangi kōleléla iyene mmwanya pa Igupto; kilikyosa iki ugwe kusuma, ikyene kisakubombigwaga.”

Ena, lumu u mpāti yumo alinkuti, “Butoyofu!”

<sup>100</sup> Loli akabalilo kāko abene bāketile ifundo isyanaloliloli isya iki, ukwega, ukwisa ukuboneka, abene bakābagile ukukikoleléla pási ikyene kangi mma. Abene bāmenye umwene ātumigwe na Kyala.

<sup>101</sup> Polelo, linga Mōse āyobile umwene ākibwene kila, nukubikila ubuketi ikyene ukuya Bwanaloli polelo Kyala ikufimbilisigwa, linga ubo bo Bwanaloli, uku linganisigwa nu kusisimikisya i lisyu lya nnyambala yula, u Bwanaloli. Ikyo kyo kyabwanaloli.

<sup>102</sup> Linga Yeso Kristi ālimíle pala nukubala, i lisiku lila, “Ilisiku ili i Lisyu ili lisisimikisigwe pankyeni pa umwe,” Kyala ikufimbilisigwa ukupela ukuti i Lisyu líse kukuboneka.

<sup>103</sup> Uswe twimile apa ikilo iki, ukuti, “Yeso Kristi yo yuyo mmayolo, umwisyugu, na bwilanabwila.” Kyala ikufimbilisigwa ukusismikisya ikyo ukuya lulo, panongwa yakuti Ikyene kyo Lisyu Lyāke. Lilino, ngimba ikyene kikubomba fiki? Ikyene kikwegela u lwitiko, ukwitika Ikyene. Kikwegela u lwitiko, mu kwitika i Lisyu Lyāke, ukuti Ilyene lyo Bwanaloli.

<sup>104</sup> Kētésya iki kyālisíle ukuboneka akabalilo kāko Mōse ātwele a bāna panja, na bosa bala bankōngāga umwene. Bala bábo bakalinkōngíle bāsyele mu Igupto. Loli bala bábo balinkōngile Mōse, akabalilo kāko abene bāsōkile ukufuma panja pa Nyanja Ingeseфу nukufika ndulangalanga, Kyala alinkwisa pa Kyamba Sinai. I Mbanda ya Moto yila yilinkubíka ikyamba kyosa pa moto, kangi i Lisyu lilinkuyoba ukufuma mu kila, kangi Kyala alinkubapa abene ingomelesyo kalongo.

<sup>105</sup> Mōse ābagíle ukwenda pamwanya pala pankyeni pa bandu, nukuti, “Ilisiku ili i Lisimbo ili une mbabulíle umwe, ukuya nsololi Gwāke, likwisa ukuboneka i lisiku ili. Une mbabulíle umwene ukuti Kyala ālyāgéne na une, kangi pamwanya pala mu lusingi ulupyu, mu Mbanda ya Moto, kangi Umwene āyobile iki, ‘Une ngwisa . . . Iki kisakuyaga kimanyilo. Ugwe kwisakubatwala a bandu kunokuno ukugomokela ku buyo ubu apa kangi.’ Kangi alipo Kyala, mu Mbanda ya Moto une mbabulile umwe Umwene āli, ikwēléla palapala pa kyamba. Ilisiku ili u busololi ubu busisimikisígwe. Apa Umwene abagisenie ukusisimikisya ukuti i findu ifi une njobile fyo Bwanaloli.”

<sup>106</sup> Kyala tupapo uswe abanyambala ukongelelápo bo bala, aba bo banaloli-ndumbula kangi babwanaloli, nukuyoba u Bwanaloli, ukuti Kyala Mwenemaka abāgíle ukusisimikisya ukuti i Lisyu Lyāke lyo likāli Bwanaloli! Umwene akāli



yo yulayula mmayolo, kangi bwila. Ngimba fiki Umwene akābombaga ikyene? Umwene afingile ukubomba sisisi.

107 Yoshua abāgile ukuyoba kilakila, i lisiku lilyo umwene āgomokile ku Kadesh-barneya, kūko abene balyendīle kubutali fiyo ndulangalanga. Abene bīlamwaga i kisu ukuya u luko lwa kisu ulu Kyala āyobile ikyene kyābagīle ukuya. Loli u Kyala ābabulīle abene ikyene kyāli kyo kisu ikinunu, ikyene kyendelelaga nu lupyū nu lūki. Kangi Yoshua na Kalebu bāli babili bene aba bābagīle ukwitika ikyene, ukufuma ku bala kalongo aba bābukile. Akabalilo kāko abene bikugomokako, abene bāli nu buketi; abene bali ni kipambo kya mipesa iki abanyambala ba maka babili bābagīle ukupimba itolo.

108 Yoshua na Kalebu bābagīle ukwima palapala pala nukuyoba, “Ilisiku ili i Lisimbo ili lisisimikisīgwe. Apa bulipo u buketi ukuti ikye kyo kisu ikinunu.” Naloli. Nongwa ya fiki? “Pala bulibo u buketi ukuti ikyene kyo kisu ikinunu. Ko kugu kūko ugwe ubagīle ukwagamo ifindu bo ifyo, mu Igupto? Bukalipo ubo bo ubo. Loli i lisiku ili i Lisimbo ili lisisimikisīgwe.”

109 Umwene ābagīle ukuyoba i kindu, kilakila, akabalilo kāko umwene āsolwile nukuyoba ifibumba fya Yeriko fikugwaga pāsi ukufuma pāpo abene bākuyīle ukusyungutila ka hano na kabili, amasiku mahano na mabili, kahano na kabili pisiku. Kangi akabalilo kāko abene bākuyīle ukusyungutila akabalilo ka bumalikisyo kala, ifibumba filinkugwa pāsi. Yosha āngali imīle mmanya nukuyoba, “Ilisiku ili, u Ndongosi Unnyafyale ugwa kilundilo kya Ntwa uyu alimbulīle une imilungu igi gikindilepo ukuti ikyene kisakuboneka bo ulu, i lisiku ili i Lisimbo ili lisisimikisīgwe.” Pala filinkulambalala ifibumba, figwīle pa mfu. “Isaga kuno, unko uswe tukyeye ikyene. Ikyene kyitu uswe. Ilisiku ili i Lisimbo ili lisisimikisīgwe.”

110 Bo buswigisye buki, abanyambala ba Kyala bīmīle ku findu ifi fyo fitalusye!

111 Israeli, pa kisōko, bo abene bapokīle i kisu, balinkukilania. Ngimba abene bābukaga ukubomba bulebule? Ugwe go mwesi gwa Epurelo. Umogesyo gukwisa pāsi panongwa yakuti a matalala gikwengeluka, kumwanya mu Yudai. O, yo ndongosi umbibi muki ukwene kwafwanaga ukuya ukuti Kyala āli, ukubatwala a bandu Bāke pala, mmwesi gwa Epurelo, akabalilo kāko Yorodani āli mmwanyapo kunyuma ukukinda ikyene kyalimo siku. Utubalilo tumo. . .

112 Une lumo mbagīle ukwima apa, linga une nāli na kabalilo, ukubapo umwe itolo akafundo kanini. Utubalilo tumo umwe lumo mwitugesye panja pala na kansa, pamo ugwe ubagile ukwitugasya ni mbungo yimo; ugwe kwinozona, “Nongwa ya fiki, une, ukuya Nkristi, mbagīle ukuya injila iyi? Nongwa ya fiki une nitugasyege bo ulu, linga une ne Nkristi?” Utubalilo

tumo Kyala ukwitikisya i findu ukuya fyāngisi fiyo mpaka ugwe ukabagila ukukéta kumwanya, ukusyungutira, pamo paliposa apangi, kangi polelo Umwene ikwisa nukupela i njila ukukinda ikyene kwa ugwe, ukuti ugwe ubāgile ukuyoba, “Ilisiku ili Lisimbo ili likusisimikisigwa, iki Umwene āfingile ukubomba.”

<sup>113</sup> Umwene ābalekile a bāna ba kiHiburi ukwenda itolo mu ng’anjo ingali. Abene balinkuti, “Kyala gwitu abagile ukutupoka uswe ukufuma mundapi mu ng’anjo. Loli, pópe, uswe tuisakwinama pási ku kifwana kyako.” Akabalilo kāko abene balyendile ukusōka ukufuma mula, ukununga kwa ng’anjo pa bene. . .kisita kununga kwa ng’anjo, ndigi, pa bene; abene bābagile ukuyoba, “Ilisiku ili i Lisimbo ili lisisimikisigwe.”

<sup>114</sup> Akabalilo kāko u Danieli, ikwisa ukufuma ku mbako ya ngalamu, umwene ābagile ukuyoba ikindu kilakila.

<sup>115</sup> Yohani u Mōsi. Ukufuma ku fyinga bamia bana ubwa bumanyisi bwakipangapanga, yo nongwa i kipanga kila kyāli nkinyanyasi pa kabililo kala! Akabalilo kāko umwene ābonike mu lulangalanga, u Yorodani, umwene ābagile ukwima palapala pala pa kiloboko, mumo umwene ābombile, nukuyoba, “Ilisiku ili i Lisimbo, Yesaya 40, lisisimikisigwe.”

<sup>116</sup> Mumo une nābagile ukwima apa nukubabula umwe iki u mpūti unkangale yula ālimbulile une! Alinkuti, “Mwanangu ndumiana, ugwe ukamalisisyemo siku i Ndumi yila.”

Une ndinkuti, “Yaga papápo.”

Umwene alinkuti, “Ugwe kusanusya ukuti bala aba kiPentekosti batikukibona ikyo?”

Une ndinkuti, “Umma.”

<sup>117</sup> Umwene alinkuti, “Une ngukéta ikyene.” Kangi u mpūti gwa kiKatolika, yópe! Uu-huu. Umwene alinkuti, “Nongwa yafiki ugwe ukākindilile?”

Une ndinkuti, “Yaga kimyemye.”

Umwene alinkuti, “Lwimiko kwa Kyala! Une nguketa ikyene.”

<sup>118</sup> Kangi ukufwana akabalilo kala u Mbepo Mwikemo āgwile pa ilumbu gwāke, itugesye panja pala mu lukomano. Kangi umwene undumbu alinkufyuka, ukuyoba mu ndimi insitakumanyigwa, nukupa ikyakusanusyo kya kindu kilakila iki u mpūti na une twayobelaga ngapo, pa kigemo. I kipanga kyosa, ubuyo bosa, kilinkubuka mu nkubuna. Kyākindilile kula mu lukomano-ulukulumba kwa Oral Roberts undungu ugu gukindile, pamo undungu ugungi gula, kangi bwali buyobi bwa lukomano-lukulumba. Muno u mpūti yula. . .Itugesye pási pa Mbepo Mwikemo, asetuligwe panja pala ukwisila mu nkikulu yumo, ulilumbu gwāke une ngusubila umwene āli, isya iki kyabonekaga pamwanya pala pa kigemo, kangi ukusetula ikindu kila iki uswe twāfisaga.

119 Isala iyi uswe tukwitugasyamo, i lisiku ili i Lisimbo ili lisisimikisígwe. Ilisiku ili iMuli syakunamayolo sisile, kangi uswe tukukibona Ikyene. Kétésya.

120 Yohani átile, “Ilisiku ili une yone, ‘isyu ilya yumo ikukúta ndulangalanga,’ mumo áyobile u nsololi Yesaya, ‘Tendekesya injila ya Ntwa.’”

121 Abene bakákipilikisye ikyene. Bikuti, “O, ugwe gwe Yeso . . . ugwe gwe—ugwe gwe Kristi,” ndigi.

122 Umwene alinkuti, “Une ngaya yo Kristi yula mma.” Umwene alinkuti, “Une ngaya gwakufwana nukwabula ifilato Fyáke. Loli,” umwene alinkuti, “Umwe ímíle nkati mmyinu, pabuyo bumo,” kabuno umwene áli nsisimikisyi ukuti Umwene ayaga pakuya pala. Umwene ayaga pakuyako mu lisiku lyáke, panongwa yakuti Kyala álimbulíle umwene ukuti umwene áyaga pakuntalula u Mesiya.

123 Ilisiku limo u Nnyambala unkeke ikwisa ikwenda pási ukukinda ukukilania mula, kangi umwene alinkukéta ngati Lumuli pa mwanya pa Umwene, i kimanyilo. Kangi umwene alinkuláta, “Kéta u Kang’osi gwa Kyala! Ilisiku ili i Lisimbo ili lisisimikisígwe pankyeni pa umwe.” Naloli.

124 Pa Lisiku lya Pentekosti, mumo Peteri álimíle nukwandisya i Lisimbo lyábo, ilya Yoeli 2:38. Akabalilo káko, abene básekága, abandu bala. Abene bakáyobaga mu njobelo yabo bene. Abene batabililága i kindukimo ikingi. Ili Bángéli lyátile, “Indimi injabanie.” *Injabanie* ko ululimi “uluyabanikane”, kisita kuyoba nakimo, itolo ukutabilila. Ukubopa ukusyungutila ukufwana bo kipambo kya bandu ba kinwelwa!

125 Abene abalinkuyoba, “Ena, abandu aba bagálíle. Bakéta abene, kéta mumo abene bikubombela, mumo abakikulu na banyambala bala. Abene bafuganisigwe,” balinkuti kila ikibugutila kyabwiputi ikyá lisiku lila.

126 Peteri alinkfyuka mmwanya nkati mwa bene, alinnkuti, “Banyambala na bakundwe, umwe mwe mukwitugasya mu Yerusalemu, kangi umwe mwe mukwitugasya mu Yudai, unko ikyene kimanyisigwe kwa umwe ukuti aba bakaya bagále mma, mumo umwe mukusakikisya, kabuno iyi yo sala ya butatu iya lisiku. Loli iki kyo ikyo iki kyáyobigwe nu nsololi Yoeli, ‘Ukwene kukwisa ukuyako mmasiku agabumalikisyo, Une ngwisa kōnelela panja u Mbepo Gwangu pa mbili guligosa.’ Ilisiku ili i Lisimbo ili lyásisimikisigwe.” Naloliloli.

127 Luteri áli palapala pa kabalilo. Wesley áli palapala pa kabalilo. Pentekosti áli palapala pa kabalilo. Nakimo ukusókápo pa lubatiko mma.

128 Lilino une ngubalalusya umwene ukwinogona i ngulilo na kabalilo uswe lilino tulimo nu bumi, ni Lisyu ilifingigwe ku mwisyugu. Linga kunyuma mu ngulilo isingi, abanyambala

bābagīle ukuyoba, “i lisiku ili i Lisimbo ili,” “i lisiku ili i Lisimbo ili,” polelo ngimba bule i Lisimbo lya lisiku ili? Ngimba kyo fiki iki kifingigwe ku lisiku ili? Ngimba po pōki apa uswe tukwima? Ngimba yo sala nki iyi uswe tulimo nu bumi, akabalilo kaka i koloko yikukuba, i koloko ya sayansi, amaminiti matatu pankyeni pa kilo pakati? Kisu kili mu kupepeluka. I kipanga kili nkitala kya bubole. Kula nayumo amenye kūko abene bīmīle. Ngimba ko kabalilo kaki aka lisiku akene kali? Ngimba fyo fiki ifya Lisimbo lya lisiku ili? Ubwitugasye bwa kipanga, pamo, ubwitugasye bwa kipanga umwisyugu!

<sup>129</sup> Nkisu, ndyāli, ifipanganio fya kisu kyitu, kyo itolo kibolile mumo ikyene kibāgīle ukuya. Une ngaya gwandyāli. Une ne Nkristi. Loli, une ngaya ni mbombo nayimo ukuyoba isya ndyāli, loli une itolo ngulonda ukuyoba abene babolīle ku mbafu-ibili syōsa.

<sup>130</sup> Une nāsopīle ulusalō kamokene, lula lwāli lwa Kristi; une ngufimbilisigwa ukuponjola. U mōhēsi āsalile ukulwana na une, kangi Kristi āsalile ukutulana na une; kikwegela u lubafu luki ulu une ngusōpa ulusalō lwangu. Une nhobwike une nāsopīle pa Mwene; unko i kisu kiyobe iki ikyene kikulonda. Une ngāli ngwitika ukuti Umwene yo yulayula mmayolo, umwisyugu, na bwilanabwila. Umwene isakusisimikisya ikyene. Umwene naloliloli ikwisa. Naloliloli.

Ukubāla kwa lutūlo, ubutamie bwa bāna!

<sup>131</sup> Kēta ku kisu kyitu, akabalilo kamo lyāli liluba lya kisu kya pāsi, u demokalase gwitu unkulumba ābumbigwe kunyuma kula mu—mu i. . . ku bufumusye bwa bwabuke, kangi u bufumusye bwa bwabuke kwasainilīgwe, kangi uswe twāli nagwe u demokalase, kangi abatasi-batāta bitu abakulumba, kangi i findu ifi abene bābombile, uswe twāli ni kisu ikikulumba.

<sup>132</sup> Loli umwene lino abolīle, kangi ikubongotoka, kangi ikusenyendigwa, nukwisopela panja. Kangi ukugela ukubasōngēsya īsōngo abandu, ukusyaga ihela isyakutuma kwisilya, ukula ubwinake na balugu bābo; abene bikututagile iyene ukugomokesya nkisyo kyitu. Ubwīte bwa kisu kyosa ubwākūwānda, ubwīte bubili ubwa kisu kyosa, kangi pōpe tukubuka ku bwabutatu. Naloliloli. Indyāli sibolīle, sibolesigwe, sibolile mpaka na pāsi. Katikati itolo iki Matai 24 āyobile ikyene kikuyaga, “Ikikolo kikuyaga kikulwana ni kikolo, ikitangalala ukulwana ni kitangalala.” Ifindu fyosa ifi fisakubonekaga pa buyo. Unko uswe twitikisye iki lilino. Umma ndaga.

<sup>133</sup> Kētēsya ikingi, ikubāla mu kalondalonda gwa bumang’anyi. Lilino, akabalilo kamo, itolo i. . . Umbuya gwangu ugwakinyambala ābukīle ukwakwagana nu mbuya gwangu ugwakikulu, mu gileta lya ngambako. Lilino iyene yo ndege ya jeti, pamo yōpe unsyungutulo mmwanya, nkati mu fwasi. Ikyene kyo kikulumba. . . Bulebule, ywani āyobile iki? Danieli 12:4,

ãtile, “Ubumanyi bwisakubãla mmasiku ga bumalíkisyó.” Uswe tukuketa i sala iyi uswe tukwitugasyamo. Kêtesya lilino u—u bwitugasye bwa kisu kya pási, ubwitugasye bwa bumang’anyi.

<sup>134</sup> Kangi kêtesya kangi, umwisyugu, mu lubatiko lwabumanyi. Lilino komma ukugela ukukãna iki. Une ndinakyo utukalatasi twãnyuzi, ukumanyisya isya kugonana nkyitu nkipan-... mmasukulu gitu, isya bãna ba sukulu abakeke ukuya nu bwĩnake bwakugonana yumo nu nnine, ukukéta linga abene babãgile ukugonana nkisu. Ena, nkulumba.

<sup>135</sup> Bule mu bupũti bwitu? Ikilo iki une nkãgile akayabo ka kalatasi. Kula ku Los Angeles, California, isya kũko ikipambo kya banyambala-bapũti, baBaptisti kangi baPresbeteri, abalumbilili, bãtwéle ikipambo kya bagonana-banyambalabatupu mula nukubabombela isya kugonana-banyambalabatupu, bikuyoba abene bãgelaga ukubakaba abene kwa Kyala. Akabalilo kako, ikyo kyo kimo mwa figure fya sala iyi, u Nsodomu! Kangi ululagilo lópe lulinkubabika mminyololo abene.

<sup>136</sup> Lilino ngiba uswe tuli pũki? Ulubatiko lwitu losa lubolile ukufuma pási pa uswe. Une ngêtile ukubãla kwa bagonana-banyambala-batupu ukukilania u United States kubêle malongo-mabili pamo malongo-matatu pa bandu mia yumo nkyinja. Inogona isya ikyo, unnyambala ukugona nu nnyambala, katikati itolo bo abene bãbombelãga mu Sodomu.

<sup>137</sup> Ukubãla kwa lutũlo, ubutamie bwa bãna! Yo salanki iyi uswe tukwĩtugasyãmo? Ilisiku ili i Lisyu lya busololi ili lisisimikisígwe.

<sup>138</sup> Ikisu kyabwipũti, i kipanga kyene, i kipanga, i kipanga ikikõlelígwe-panja, iki uswe tukukikõléla i kipanga ikikõlelígwe-panja, i ngulilo yabumalíkisyó ya kipanga, i ngulilo ya kipanga kya kiPentekosti, ngimba ikyene kili kugu? Ikyene kili mu Laodikiya, mumo i Lisimbo lyãyobíle.

<sup>139</sup> Umwisyugu abene bĩkilísye pási ulupaso. Abakikulu bãbo bafwele-sinda. Abanyambala bãbo bali... Ikyene kyo kindu kibibi. Bamo mwa bene mbwegi katata pamo kana kosa, pa kibugutila kya bakulumba ba kipanga, na filifyosa ifingi. Abene bĩsisye pási, nukutwalamo nkati ububóle, panongwa yakuti abene bitugesye mu bukambala nukwega u buyo ni kisu kya pási.

<sup>140</sup> Kangi, umwisyugu, abene bali ni miyumba iminunupo, abene bãlinafyó siku. Ubuyo bumo, kimo mwa fyene kikuyenga ikyumba kya madola maelifu-elifu malongo-mahano, madola maelifu-elifu malongo-mahano. Aba kiPentekosti! Ukwene kwãlisibilígwe ukuya pási pa nguto, ifyinja malongo-mabili-nafihano iyolo, ukukuba i ngwãya. Alinkuti, “Uswe...”

<sup>141</sup> Panongwa yakuti, i Lisimbo lyãyobilw, mwa Busetuli 3, ukuti umwe mwe muli “‘Bakabi,’ bikuti, ‘Une ndinkabi. Une

ngwitugasya ukuya bo mwehe. Une ngaya nako ukulondigwa kwa nakimo.’ Kangi ukamanya ugwe umma ukuti ugwe guli gwasoka, mpelakisa, ndōndo, gwāngelebúno, bafwamaso kangi ukamanya ikylene!”

<sup>142</sup> Ilisiku ili i Lisimbo ili lisisimikisigwe mmaso ginu. Ameni! *Ameni* ikusanusya “momumo kiyege ikylene.” Une ndikwiyobela ameni kwa nimwene mma, loli une ngusanusya ukuti une ngwitika Ikyene kyo Bwanaloli. Ilisiku ili Lisimbo ili likusisimikisigwa.

<sup>143</sup> I kipanga kya kiPentekosti kili mbwitugasye bwa Laodikiya. O, abene bakāli bikunyela nukuywega, mukwiyegelamo akabalilo kāko ulwimbo lukukuba. Akabalilo kāko ulwimbo lūkwīma, pamo ulwimbo lwa kwasakwasa bamo mwa bene bikukina kangi ukukōléla ikylene Kikristi, kangi akabalilo kalikosa kila kikwima, ulwimiko lōsa lukindīle. Ena.

<sup>144</sup> Linga ulwene lo lutufyo ulwanalololi ulwa Kyala, kukaya ulufi ulwakufwana kangi agakufwana—agakufwana a maka nkisu ukwimika ulwene. Akabalilo kāko ulwene nalololi lukufumila kwa Kyala, ikylene kitikwegela ubwimbilo ukubika ulukino pala. Ulwene lukwegela Mbepo Mwikemo ukusuluka pási pa lwene. Ikyo kyo iki kikubomba ulwene.

<sup>145</sup> Kangi abene bībwbwe Ikyene iyolo fiyo, panongwa yakuti abene bakiyabile ikyabupi kya Mbepo Mwikemo, “ubuketi ubwakwandila bwa kuyoba mu ndimi.” Kangi une mbilike imisyétano na balosi bikuyoba mu ndimi.

<sup>146</sup> U Mbepo Mwikemo yo Lisyu lya Kyala mwa ugwe, kila kikwilingania Kyene ukwisila mu kwitikisya i Lisyu lila. Panja pa ikyo, ikylene kikabagila ukuya Mbepo Mwikemo. Linga ikylene kikuyoba ikylene yo Mbepo Mwikemo, kangi kikukana i Lisyu limo ilya i Bangeli lila, ikylene kikabagila ukuya Mbepo Mwikemo. Ubo bo bukéti ukuti pamo kwitika pamo mma.

<sup>147</sup> Kētésya ikimanyilo ikingi ikikulumba. Aba Yuda bali nkisa kya kāya kābo; ikikolo kyabo bene, ihela yabo bene, i mbakasya ya United Nations. Abene bali nabo ababwite bābo bene. Abene bali nakyo kilikyosa. Abene bali nkisu kya kāya kyabo; iki, Yeso ātile, “Manyila ikimanyilo kya mpiki gwa māfīlu.” Kula abene baliko, kulakula ukugomokela nkikolo kyābo. Ilisiku ili i Lisimbo ili lisisimikisigwe, aba Yuda nkisu kya kāya kyābo.

<sup>148</sup> Ilisiku ili i Lisimbo ili līsīsīmīkīsīgwe, i Ngulilo ya Kipanga kya Laodikiya.

<sup>149</sup> Ilisiku ili i Lisimbo ili, Matai 24, līsīsīmīkīsīgwe. Iki kili mu bubōle, ikindu kyosa; ifisu ukulwana ni fisu, abakasenyenda mmabuyo amakindanekindane, abakafulafumbi abakulumba ukusuluka pási, ukusenyenda i fisu, ni findu bo ifyo, ubutolwe ubukulumba kulikosa. Ilisiku ili i Lisimbo ili līsīsīmīkīsīgwe.

150 Lilino uswe tukusyagania ibwitugasye bwa kisu. Uswe tukukéta kũko i kipanga ikyābwila—ikyābwila, ikibugutila, ikipaguke, uswe tukukéta kũko abene bāli. Uswe tukuketa kuko ifisu fili. Kangi uswe tukukéta ukuti i lisiku ili ifngi isi sisimikisigwe.

151 Lilino, loli mu lisiku ili pisakwisaga ugwapamwanya, u Luyungu Lwabunyafyále lwa Abraham. Ikyo kyo katikati iki Ikyene kisakuyaga, ukuyaga u Nsīngiligwa Gwabunyafyále ku Gwabunyafyále, Mwanundumiana umfingigwe. Mumo une nāyobile ikilo kya mmayolo, iye yitisakuyaga mbeyo yākipeligwa mma, iyene yisakuyaga Mbeyu yamwāmbepo. Apene pabagile ukuyapo u Nsīngiligwa ugwamwāmbépo ikufyuka mmwanya, uyu yo isakuyaga yo Luyungu Lwabunyafyále ubwa Lwitiko lwabunyafyale lwa Mwanundumiana Gwabunyafyále gwa Abraham. Umwene abagile ukwisa pa buyo mmasiku ga bumalikisyo, kangi akabalilo nu buyo lo lufingo ulu lupigwe ku Mwene.

152 Ukufwana na Malaki 4, i Lisimbo, pala pabagile ukufyuka i Ndumi iyi yisakusenyenda i ndumbula sya bandu ukugomokela kulakula ku ba tāta ba kipostoli kangi. Pabagile ukutupuka yumoywene pa buyo, mmaka ga Eliya, uyu isakufyuka pa buyo; u nnyambala gwa mmatengele uyu isakusōka panja, kangi isakuya ni Ndumi iyi yisakubopa ukugomokela kulakula ku Lisyu kangi. Iyo yo sala iyi uswe tukwitugasiamo.

153 Polelo, inogonela lilino, une ngukusuma ugwe pa sala iyi, umwe bandu apa aba Jeffersonville. Mu 1933, u Lumuli ulukindakipeligwa ulu lwāgwile pási kula pa kisōko, i lisiku lila akabalilo kāko une nōsyaga abamia bahano mu Ngamu ya Yeso Kristi, ukuya ukufwana ndumiana gwafyinja malongo-mabili-mbukusi. Ngimba Ikyene kyāyobile fiki, Jeffersonville? Ngimba Ikyene kyāli fiki ku malundi ga Spring Street kula, akabalilo kāko i *Courier Journal*, une ngusubila iyene yāli i *Louisville Herald*, yāpimbile i nongwa ya Ikyene? Iyene yābukile mpaka ukukilania ku Associated Press, mpaka na ku Canada. Doctor Lee Vayle alinkutumula ikyene ukufuma ku kikalatasi, kubutali kula mu Canada, mu 1933.

154 Akabalilo kāko une nōsyaga umundu gwa kalongo-na-bahano-na-babili gwangu, pási pa Nketi uyu; kangi umwe mumenye akapango aka kasyele. Kangi akabalilo kāko une nimaga pala, ngōsya umundu gwa kalongo-na-bahano-na-babili, u Lumuli lulinkusuluka ukufuma ku Mwanya, ukumulika pási pamwanya pa pala, ukuya bo Ndondwa yikugwa ukufuma ku Mwanya. I Lisyu lilinkuti, “Mumo Yohani u Mōsi ātumígwe ukutalula ukwisa kwākwanda kwa Kristi, i Ndumi yāko yisakutalula u Kwisa Kwāke kwakibili, nkisu kyosa.” I lisiku ili Lisimbo ili lisisimikisigwe.

155 I lisiku ili! Kyala āfingile ikyene. Ngimba fiki fyabonike? I lisiku ili Iyene yibūkile ukusyungutila i kisu.

156 Kangi akabalilo kāko Kyala āsulwike pāsi pala nukuyuba kila, akabalilo kāko une nāli ndumiana nmini, mu lusingi ulupye, pamo pa lusingi pamwanya pala, pa moto ni Mbanda ya Moto, pamwanya pala ku buyo bwa Wathen pa Utika Pike; ngupimba a misi kunyuma kula, ukufuma ku ndāmba yila ukubuka ku bupiyilo bwa kachasyo, umwe mumenye ubwanaloli bwa ikyene. Umwene alinkuti, “Komma ugwe ukukwesa ingambo, pamo ukunwa, pamo ukōnānga umbili gwako, kabuno yilipo i mbombo kuli ugwe ukubomba akabalilo kāko ugwe kuya nkusipo.” Une ngwilāta ku kila ukuya Bwanaloli, ukuti une nākiwbēne Ikyene. Kangi Kyala, mumo Umwene ābombīle nu Mōse, āyobīle panja pankyeni pa kilundilo pāsi pala, nukuti, “Ubu bo Bwanaloli.”

I lisiku ili i Lisimbo ili līsīsimikisigwe nkati mwa uswe.

157 Kētēsya iki Umwene āyobīle ukufwana nu kumanyaminogono, na mumo ikyene kikuyilaga; ukufuma kukubikapo ifiboko pa bene, ukubuka kukumanya isyakubutitu sya ndumbula. I lisiku ili i Lisimbo ili līsīsimikisigwe pankyeni pa maso gitu gagaga.

158 Ifingo isi sisyo syātendekīgwe, kētēsya, ifingo syōsa isi syāsisimikisigwe nu kufwanikisigwa na Kyala ugwa lufingo. Kéta, kipayikīgwe mu Washington, DC, ikilo iki, i picha ya Gwandumi gwa Ntwa!

159 Bo yo George J. Lacy, unkulumba gwa FBI ubulabe-bwa-nyobe ni fikalatasi fya sikali ya United State, ākigelīle Ikyene ukufuma ku Houston, Texas, nukuti, “Iki kyo kyene Kindu kikindafipeligwa iki kyakomigwēmo ipicha siku nkisu kyosa.” Umwene ābagisēnie ukumanya; umwene yo nnunu ukukinda-bosa aba baliko nkisu, kuli ikyene.

160 Kētēsya, mula Ikyene kipayikīgwe, ukuya Bwanaloli, i Mbanda ya Moto yilayila iyi yalongolīle Israeli ukugomokela kula ndulangalanga. Ikyene kikulongosya umwisyugu, u luko lulalula ulwa Ndumi, ulwa, “Sōka panja pa Igupto!”...?...I lisiku ili i Lisimbo ili līsīsimikisigwe. Umwe mumenye i Ndumi iyi Umwene āyobīle.

161 Kéta i mboniboni iya Tucson, ifyinja fitatu fikindilepo, akabalilo kāko une nālimīle apa pa nsebwe. Akabalilo kāko, ifyinja fihano bo kikāli ikyo, Umwene āyobile, “I lisiku ili aba nkāya bikukomelela ulwēgo pāsi pankyeni pa kipata kila, sanukilaga gwimwene ukubuka ku Bwingilil’ilisūba.” Abinangu abakipanga aba bāli apa, bamenye ukuti lum-...kala—kala akabalilo. Uko ko kotalusya.

162 Kangi i lisiku ili Tata. Goynes na bala bāli pamwanya pala, nukukomelēla ulwēgo lula pāsi, Une ndinkuyoba ku nkasi, “Kilipo ikindukimo ikyakufwana na iki.”



Umwene alinkuti, “Ngimba ikyene kyo fiki?”

Kangi une ndinkubuka mula nukukéta mwa buku gwangu unnini. Pala ikyene kyáli.

<sup>163</sup> Kangi ulubunju ulukonge lula, pa sala ya kalongo, nitugesye nkati mula, nkyumba kyangu mula, ukufwana i sala ya kalongo, u Gwandumi gwa Ntwa alinkusuluka pási. Umwene alinkuti, “Buka ku Tucson. Ugwe kwisakuyaga ku lulu-kubwingilil’ilisuba kwa Tucson, kangi pala bisakwisaga a Bandumi bahano-na-babili nkibugutila iki kisakusenyenda ikisu kyosa ukusyungutila ugwe.” Kangi alinkuti, “Ikyene kisakubúligwága kwa ugwe ukufuma pala.”

<sup>164</sup> Ngimba balinga bikukumbukila ikyo, apa, kubutali bo ikyene kikaboneka? [Ikilundilo kikuyoba, “Ameni.”—Nsimbi.] Balipo abanyambala bítugesye papapa apa nkiyumba iki ikilo iki, bālimile palapala pala akabalilo kāko ikyene kyābonike.

<sup>165</sup> Kangi alinkuti, “Ifimyatiko Fihano-na-fibili ifya ifyakubutítu ififisigwe ifya i Bangeli lyosa fisakwiguligwaga, nukufwanikisya Ubusetuli 10, ukuti mu Ndumi gwa Gwandumi gwa buhano-na-babili ifindu ifi fibagisenie ukwisa ukuboneka.” I lisiku ili i Lisimbo ili lisisimikisigwe pankyeni pa māsō ginu. I lisiku ili i Lisimbo ili lisisimikisigwe.

<sup>166</sup> Nkyinja, nīmīle pa buyo bulabula, u Tata. Wood apa na une, tukufyuka a kām̄ba, nduko lwa kukúta, ukufwana nu nkasi gwake ukuya mbine, u Mbepo Mwikemo alinkuti, “Pimba mmwanya i libwe lilambalele pala. Sōpa iliyene mmwanya mu mbepo. Akabalilo kāko iliyene likwisa pási, yoba, ‘ISI SYO IKUTI U NTWA, kwisa kuyako u bulongi bukutika i kisu.’ Mbula umwene ukuti umwene isakukibonaga ikiboko kya Kyala, isala innandi isi sikwísága.”

<sup>167</sup> Une nālimbulíle u Tata. Wood; ali papapa ikilo iki. Kangi, une ngusakikisya, lwele pamo kalongo ba banyambala, pamo kalongo-na-bahano, aba bāli pala akabalilo kala akabalilo kāko ikylene kyāboníke pa buyo; u lubunju ulukonge, kúko u Ntwa āsulwike mu kafulafumbi nukulepulanía i kyāmba mosa ukusyungutila uswe, nukutumula imyíanya gwa fipiki ukuya paitolo, nukupela ukupufuka kutatu, nukuyoba, “Ubulongi bukubuka ku Kiloboko kya Bwingil’ilusuba.”

<sup>168</sup> Amasiku mabili ukufuma pala, Alaska kifuki ukumilwa pási pa kisu. Kangi ukufuma lulalula, ukufyuka-nu-kusuluka i Kilobo, ulutúyo lwa bulongi bwa Kyala ukulwana ni kikételo kyamwambepo kila. Kilipo ikibālika ikyakisulu, kilipo ikibālika ikyandāsi, kangi kilipo ikibālika kya butulwanongwa.

<sup>169</sup> Ubwigufu bwendile ni lisūba; mo mumo i Nongwainunu yópe. Abene bāfumile ku busōkel’isuba nukubuka ku bwingilil’isuba, mumo i lisuba likubūkila. Kangi lilino Ubwene buli pa Kiloboko kya Kubwingilil’isuba. Ubwene bukabagíla

ukubuka ukukĩndilĩla mma; linga Ubwene bukũndilĩla, Ubwene bukugomokelaga ku busõkelolisuba kangĩ.

<sup>170</sup> U nsololi āyobile, “Lisakwisa i lisuba ili likabagila ukukõleligwa kilo pamo pamusi,” i lisiko ilyabutolwe, ifula yi nyingi ni kifũnienie, itolo ukufwana ukumanya mumo ukwingilila i kipanga pamo ukubĩka i ngamu yāko pa buku. “Loli ukwene kwisakuyako u Lumuli ukufwana akabalilo ka namayolo.” I lisiku ili i Lisimbo ili likusisimikisigwa.

<sup>171</sup> Lilalila—lila l-i-s-u-b-a ili likusõka kubusõkelolisuba lilalila l-i-s-u-b-a ili likwĩngĩla ku bwingililolisuba. Kangi yulayula u M-w-a-n-u-n-d-u-m-i-a-n-a gwa Kyala uyu ālisile kubusõkõlolisuba nukwisisimikisya Mwene ukuya Kyala abonesigwe mu mbili, yo yulayula M-w-a-n-u-n-d-u-m-i-a-n-a gwa Kyala ku busyungutile-bwāsinda ubwakubwingililolisuba kuno, uyu yo ikwilingania Mwene pakati pa kipanga ikilo iki, yulayula mmayolo, umwisyugu, na bwilanabwila. U Lumuli lwa kunamayolo ulwa Mwanundumiana lwisile. I lisiku ili i Lisimbo ili lĩsisimikisigwe pankyeni pa uswe.

<sup>172</sup> Ngimba tuli põki uswe mu ngulilo ya Abraham iyi? Ngimba uswe tuli põki nkabalilo akakulumba aka kāko uswe tumwilemo, isala ingulumba iyi uswe tukwitugāsyāmo? Imboniboni syõsa sisimikisigwe.

<sup>173</sup> Bule isya kabalilo kāko u ndumbilili umwinitu unnini apa, ikipanga ikyabulumbu ikililani, Junior Jackson, ikubopa ikwisa ku myitu ikilo kimo, une ndi pāsi kula, alinkuti, “Une nāli ni—ni njosi, Nkundwe Branham, iyi yikundamia une. Une ngētile abakundwe bosa bikukomana pa kāmba kamo.” Kangi alinkuti, “Pamwanya pa kāmba aka, ugwe gwāmanyisyaga uswe ukufuma ku masimbo aga gāsimbĩgwe, gabonekaga ngati, mmasimbo gamo akabalilo kala gākumbĩgwe ukufuma mu lyalabwe. Akabalilo kāko ugwe gwamalisisye kila, fyõsa ifi fyāmalisigwe, ugwe gwātubulile uswe, alinkuti, ‘Isaga kifuki,’ kangi uswe twesa tulinkwisa palikimo.”

<sup>174</sup> Alinkuti, “Ugwe ulinkufikila ukufuma kumo kangi, kyāboneka ukuya, gwākyagile ukufwana bo ingili ya sĩmbi kangi ulinkulupũla ikyapamwanya kya aka piramidi akanini ukwiguka. Kangi, akabalilo ikylene kyābombile,” alinkuti, “ilyalabwe lya sangalabwe likaya nakimo ikisimbĩgwe pa kyene. Kangi ugwe gwātubulile uswe uku ‘kēta nkati pa iki.’” Kangi ugwe twesa...“Uswe twesa tulinkwanda ukuketa.” Alinkuti, “Une ndinkusanusya untu gwangu, kangi une ndinkukētēsya ugwe kubuka kwingilila ku bwingililolisuba, itolo nakalingalinga mumo ugwe gwāmanyile, ukubikila ku bwingililo bwa lisuba.” Ngimba balinga bikukikumbuka ikylene? [Ikilundilo kikuyoba, “Ameni.”—Nsimbi.]

<sup>175</sup> Kangi une nālimile pala mpaka u Mbepo Mwikemo alinkusetula ikylene. Une ndinkuti, “Ili Bangeli lyosa, nu

bungwi ubu busetuligwe ku mundu, ukwisila ukugolosigwa, ukusukigwa, ulosyo mwa Mbepo Mwikemo, ulosyo mu Ngamu ya Yeso, ni findu fyōsa ifi, fisetulígwe; loli filipo ifyakubutitu ifi fifisígwe nkati, panongwa yakuti i Bangeli limyatiligwe ni Fimyatiko Fihano-na-fibili. Une ngufimbilisigwa ukubuka kula ukukwakuyaga ikyene.”

<sup>176</sup> Ulubunju lula akabalilo káko a Bangumi bahano-na-babili bala basulukége pási nukupufulania ikisu, kangu amabwe ukutagania paliposa, a Bandumi bahano-na-babili balinkwima pala nukuyoba, “Gomokelaga ku Jeffersonville, kúko ugwe kufumila, kabuno i Fimyatiko Fihano-na-fibili ifya fyākubutitu ifihano-na-fibili fisakwigulígwa.”

<sup>177</sup> Apa uswe tulipo, umwisyugu, ukupilikisya u *Luyungu lwa Liyoka*. Mmasiku amanandi itolo, linga Kyala ikwitikisya, uswe tukupilikisya ubutalusye bwa *Bwegi Nu Kusōka*. Na fyōsa ifindu ifi fiyo Kyala igwile, i Kimyātiko kilikyosa, ifyakubutitu ukufuma ku lwalo lwa kisu. Kangu uswe twāli mbuhobofu, u Kuyapo kwa sayo Syāke! Ikyo kyo kyabwanaloli. I lisiku ili, i Lisimbo ili!

<sup>178</sup> Ikalatasi ya nongwa iya *Life* yāpimbíle inongwa ya ikyene, “Ikyakusyungutula ikisitakupilikisigwa ikya Bwelu kikubúka mmwanya mu mbepo pamwanya pa Tucson na Phoenix,” mu njila yilayila iyi une nābabūlile umwe kifuki ikyinja kimokyene bo ikyene kikaboneka, mumo ikyene kikuyilāga, kango bo u mbafu-ndatu. Ikipicha kipayikigwe nkipanga pási pala. Umwe mwe mwālyegile i kalatai ya nongwa yila yilinayo ikyene. Pala ikyene kyāli, itolo katikati. Abene balinkuti, “Ikyene kili amamailosi malongo-mabili-na-mahano-na-mabili mbufyuke kangu amamailosi malongo-matatu mbukilanie.” Abene batikupilikisya mpaka na lino iki kyābonike. Ikyene kyāsetwike mbwifisefise kangu kilinkubuka mbwifisefise.

<sup>179</sup> Nkundwe Fred Sothmann, Nkundwe Gene Norman na une, twīmíle pala, batatu yo buketi, bo mumo pamwanya pa kām̄ba: Peteri, Yakōbo, na Yoháni, ukupa u buketi, bālimíle pala nukukikētésya ikyene akabalilo kako ikyene kyābonike, nukukibona ikyene kikubombígwa.

<sup>180</sup> Pala Ikyene kili, kīpayíke mmwanya; kubutali fiyo, kukayako ulubēfu, nabumo ububisi pamo nakimo ukupela i— i kifūnienie. Ngimba abene bālisíle bulebule kula? Abene bāli Bandumi ba Kyala bikugomokela, ukufuma pa Ndumi yābo. I lisiku ili u busololi bula busisimikisígwe nkati mmyitu. I lisiku ili i Lisimbo ili lisisimikisígwe.

<sup>181</sup> Kētésya, i Fimyatiko Fihano-na-fibili fīgulígwe. U kafulafumbi ali ku Kiloboko kya Kubwingililolisuba. Lilino, komma ukupondwa iki, mumo abene bābombíle ku nyuma kula.

<sup>182</sup> Lilino, ulupilikisyo lwitu, kifukiko panini ku lisiku lyitu. Ngimba i Lisimbo likuyoba fiki isya umwisyugu, kangi isya kabalilo aka uswe tukwitugasyamo? Yeso ikuyoba. . . Une ndikuyaga na kabalilo ukwega fyōsa, loli une ngulonda ukwega kimokiyene iki bo tukāli ukwigala.

<sup>183</sup> Yeso ātile, mwa Mwikemo Luka untu gwa 17, amanandi ga 30. Yeso Kristi, i Lisyu Mwene! Ngimba umwe mukwitika ikyo? Yeso Kristi, i Lisyu Mwene, apeligwe mbili, āyobīle nukuyōba iki i Lisyu likuyaga nkabalilo ka bumalikisyo, iki kikuyaga kimanyilo kya bumalikisyo bwa kisu. Umwene ākibulīle ikikolo kisakusumukaga ukulwana ni kikolo, loli Umwene ātile, “Mumo ukwene kwāyilīle mmasiku ga Sodomu, momumo ukwene kwisakuyilaga mu lisiku akabalilo kako u Mwanundumiana gwa mundu ikusetuligwa.”

<sup>184</sup> Lilino, akabalilo kāko Yeso ālisīle ku kisu, Umwene ālisīle mu ngamu ya Banabalumiana batatu: Mwanundumiana gwa mundu, uyu yo nsololi; Mwanundumiana gwa Kyala; kangi u Mwanundumiana gwa Davidi.

<sup>185</sup> Lilino, Umwene ālitugesye apa pa kisu. Umwene akāyobilēmo siku naloliloli Umwene āli Mwanundumiana gwa Kyala. Umwene ātile, “Une ne Mwanundumiana gwa mundu.” Yehova Mwene ikukōlēlīgwa Ezekieli kangi aba sololi, “Mwanundumiana gwa mundu.” Panongwa yakuti, Umwene ālisīle ukusisimikisya i Lisimbo ukuya nsololi. Mose ātile, “U Ntwa Kyala gwinu isakufyusyaga u Nsololi afwanikisigwe bo une.” Iyo yo nongwa Umwene akābagīle ukuya Mwanundumiana gwa Kyala kula, panongwa yakuti Umwene āli Mwanundumiana gwa mundu. Umwene. . . “I Lisyu lyālisīle ku basololi.” Knagi Umwene āli Lisyu mbwisusye Bwāke. Mwanundumiana gwa mundu, u—u nsololi unkulumba. . . Komma u nsololi unkulumba, loli Kyala-Nsololi, “U bwisusye bwa Kyala-ntu mumbili āli mwa Mwene.” Polelo, Umwene āli Mwanundumiana gwa mundu.

<sup>186</sup> Lilino, ku fynja maelifu mabili, Umwene amanyigwe kwa uswe ukuya Mwanundumiana gwa Kyala, Mbepo.

<sup>187</sup> Kangi mu Finj’elifu, Umwene isakuyaga Mwanundumiana gwa Davidi, pamwanya pa Kikota. Uswe twesa tumenye ikyo, aba bikwitika a Masimbo.

<sup>188</sup> Lilino, Yeso āyobīle, kubumalikisyo itolo ku ngulilo ya kipanga iki ukuti uswe tukwitugasya mu, ukuti “U Mwanundumiana gwa mundu isakusetuligwaga mu njila yilayila iyene yāli, mumo ukwene kwāyilīle ku Sodomu.”

<sup>189</sup> Kētēsya lilino, musyambukulu, Umwene ākipēle ikyene. Umwene ātile, “Mumo ukwene kwāyilīle mmasiku,” ikyākwanda, “aga Noa, mumo abene bālilaga, ukunwa, ukwega, ukupīgwa mbwegi.” Polelo Umwene ātwele, ikyakukonga, ikyabumalikisyo, ku Mwanundumiana gwa mundu, ku Sodomu.

Panongwa yakuti, kula Umwene ābombága na baYuda; apa, ku Sodomu, Umwene ābombaga na Bapanja. Kula, Umwene abakwabile abane bosa ukwisila mmisi, mbulongi; apa, ku Bapanja, Umwene ābokíkyā abene bosa ku lisiku lya Sodomu. Uko ko kotalusya. I kisu kya Bāpanja kyāpile kula, “kangi momumo ukwene kwisakuyaga akabalilo kâko u Mwanundumiana gwa mundu ikusetuligwa.” Ikyene kikaya kangi misi mma, loli ikyene kisakuyaga moto akabalilo aka. Yeso ābalíle ukufuma ku Bwandilo 23 uyu uswe tukubala, akabalilo kako Umwene ikubala isya Sodomu.

<sup>190</sup> Lilino, uswe tukwitikisya ubwitugasye ubu buyobígwe, isya bwitugasye bwa kisu ubwa Sodomu, abaSodomu, ubwitugasye bwa Sodomu. Uswe, aligwesa, isakuyoba “ameni” ku ikyo. Uswe tukwitika ikyo. Umma ndaga.

<sup>191</sup> Kangi ubwitugasye bwamwambepo bwa Laodikiya, i kipanga kipeligwa, uswe tukuyobaga “ameni” ku ikyo, nukwitikisya ifimanyilo fyābo. Uswe tumenye ukuti ikika kilikyosa kili pala. I kipanga kili mu Laodikiya. Uswe tukusimanya isyene.

<sup>192</sup> Uswe tumenye i kisu kili mbwitugasye bwa Sodomu. Ngimba uko kotalusya? Uswe twisakwitikisya ikyo.

<sup>193</sup> Loli bule isya kimanyilo kya Abraham, uyu āgulilága u mwanundumiana umfingigwe? Yula ali yo yungi.

<sup>194</sup> Kumbbukilaga, abene bāli na Sodomu kunyuma kula; abene bāli nu ntumigwa gwābo. Kangi Abraham āli nu Ntumigwa ku mwene.

<sup>195</sup> Abraham āgulilága, lisiku ukufuma lisiku, ku, kifuki ikindu ikisitakubāgíla ukuboneka. “Sarah, malongo mahano na mana, kangi umwene āli mia yumo.” Ukufwana nu lufingo lwa Kyala, umwene ākālī āgulilága. Nkati mwa fyosa ifilondesyabusobi, umwene āgulilága ku mwanundumiana.

<sup>196</sup> Momumo u mwitiki ugwanaloli akāli ikugulíla ku Mwanundumiana umfingigwe ukugomokela! Kētésya, itolo bo akāli u mwanundumiana ukufika, kyālípō ikinayilo kyāpelígwe umwene. Ngimba ikimanyilo kya Mwanundumiana uyu ikwisa kikusetuligwága ku Luyungu lwa Abraham ulwabunyafyale ulu lukugúlílila ku Mwanundumiana Gwabunyafyale, mumo ukwene kwāyilíle kwa tāta Abraham ku mwanundumiana gwakipeligwa? Ngimba uko ko kotalusya? Yeso ātile, mwa Mwikemo Luka 17:30, “Bo akabalilo aka kakwisaga,” ukuti “u Mwanundumiana gwa mundu isakusetuligwága mumo Umwene ābombíle mu masiku ga Sodomu, bo ukubongotola kukísa.” Lilino uswe tukukilonda ikimanyilo.

<sup>197</sup> Lilino unko uswe twege ubwitugasyo bwa kabalilo mumo ukwene kwāyilíle mu Sodomu. Kētésya, abene bosa bābukile panja mu kiSodomu, i kisu.

198 Une ngwinogona yumo mwa balagili ba senema ābikile i picha, pakaya patali mma, kangi une ndinkufika ukuyibona iyene, yila yāli, *Sodomu*. Linga umwe siku mukuyiketelela iyene kangi kikayapo nakimo ikingi loli ukuti, ketelela iyene. Iyene yo naloliloli picha nnunu iya United States umwisyugu, Hollywood, itolo katikati; u luko lulalula ulwa kafwalilo kangi filifyosa ifingi ifi abene bābombile kulakula akabalilo kala; ifilabu fyabakinwela ifinywamu kangi filifyosa ifingi, ikibugutula ikyuputiputi ikya bandu, bikukōlelígwa-bubu biputiputi.

199 Kētésya, kangi Sodomu āli nu nketi, kangi umwene āli mwinitu ugwa ngamu ya Loti, uyu āli itolo mwipwa kwa—kwa Abraham.

200 Lilino, Abraham akābukilemo pási mu Sodomu, umwene ni kibugutula kyāke. Umwene āli ni kibugutula ikikulumba nu mwene, ukufwana ukulwana ukubakaga abanyafyale kalongona-babili na bābwíte bābo. Polelo, umwene āli ni kibugutula ikinywamu nu mwene. Kangi umwene itugasyaga panja pala pási pa mpiki gwa syunguti, i lisiku limo, akabalilo kāko kilikyosa kyabukaga mbusobi kwa umwene; nayumo āli nakandu kamo akakubomba nu mwene, loli umwene ākāli ikukōleléla ku lufingo.

Kētésya lilino, kifuki fiyo, bo uswe tukāli ukwigala.

201 Akabalilo kala umwene itugasyága pala, pási balinkwisa abanyambala batatu, bikwenda ku mwene. Babili ba abene balinkusulukila ku Sodom nukwakulumbilila i Nongwainunu ku bene, ukusōka panja, kwa Loti. Ngimba uko kutalusya? Loli Yumoywene āsyeye na Abraham. Kētésya, Yumoywene yula uyu āsyeye na Abraham āli Kyala Mwene. Abangi babili bāli Bandumi batumigwa.

202 Lilino, pási mu Sodomu, abene bakābombile nafimo ifiswigo, kwene kukubatika abene nubufwamaso. Kangi ukulumbilila i Nongwainunu akabalilo kosa kukutika abene nubufwamaso.

203 Lilino kéta ikwitugasya kwa lisiku lila. Pala po kilipo ikipanga ikipeligwa. Akabilo kosa mbutatu, mumo une njobile ikilo iki, Kyala ikukwitwalamo. Pala balipo aba kiSodomu, a Banyalōti, kangi a Banya-abraham. Ubwene bo buyo bulabula ikilo iki, i kisu kytugesye itolo no lula.

204 Unko une mbalalsye umwe ikindukimo. Kéta ku bwitugasye ubu lilino. Abraham ālinkōlile u Nnyambala uyu āyobága ku mwene, “Elohim.” I lisyu lya kiHiburi likusanusya “Yumo unfwane-mosa, Yumo uyu yo Yumo Gwasyepwa,” Elohim, Kyala Mwene!

205 Ku bwandilo, Bwandilo 1, ātíle, “Kubwandilo Kyala...” Ega i lisyu kya kiHiburi pala, mulimosa, pamo lisyu lwa kiGiriki, ndigi, “Ku bwandilo *Elohim* āpelife imyanya ni kisu.”

206 Apa, Umwene, mwa Bwandilo, ukufwana 22 apa, Umwene ikuyoba kangi, pamo—pamo ukufwana 20, Umwene alinkuyoba, kangi umwene alinkōlile u Nnyambala uyu “Elohim.” Ngimba nongwa ya fiki umwene ābombile kila? Kyala, imililigwe mu mbili gwa bundu, uyu ālitugesye na Abraham nukulya u nkati gwa ngwata, ukunwa ulupyu lumo, nukulya unkati gumo. Kyala Mwene, nukuyonga palapala pankyeni pa Abraham.

207 Loli Umwene ālimpéle umwene ikimanyilo. Kētésya. Kangi ikimanyilo kila kyāli ko kuti Umwene ali ni nyuma Yāke isyumbutwike ku kisasa.

208 Kangi kumbukilaga, Abraham, ingamu yaka yāli *Abram* amasiku manandi bo pakāli pala, kangi Sarah āli *Sarra* bo pakāli pala; S-a-r-r-a polelo S-a-r-a-h, kangi A-b-r-a-m ukubuka ku A-b-r-a-h-a-m. *Abraham* yikusanusya “tata gwa fikolo.”

209 Lilino kētésya naloliloli kifuki apa, kangi uswe twisa kukéta ikwitugasya kwa sala iyi uswe lilino tukwitugasyamo, mumo Yeso ātubūlile uswe ukulondalonda ubwitugasye ubu. Uswe tufibwene fyosa ifya ifyene papapa; lilino unko uswe tukéte u Luyungu lwabunyafyale, ubwitūgāsye ubu abene babagile ukukéta.

210 Lilino u Nnyambala uyu āyobile, “Abraham, alikugu u nkasi gwako, Sarah?”

Kangi Abraham alinkuti, “Umwene alinkisasa kunyuma Kwako.”

211 Lilino, Umwene akālimbwenemo siku umwene. Ngimba Umwene āménye bulebule ukuti ingamu yake āli yo *Abraham*? Ngimba Umwene āménye bulebule ingamu yāke āli *S-a-r-a-h*? “Abraham, alikugu unkasigo, Sarah?”

Alinkuti, “Umwene ali nkati nkisasa, kunyuma kwa Ugwe.”

212 Umwene alinkuti, “Une...” “Une,” pulonauni ya ubwenenakyo. “Une gwisā ukukuyatila ugwe ukufwana nu lufingo. Unkasigo isakuyaga nu mwāna yula. Ugwe unsūbile Une, lilino Une nguyapakukupela ikylene kīsége ukuyako.”

213 Kangi Sarah, mu kisasa, kunyuma, ikupilikisya kimyemye pamo ukupila ululehého, kali umwe mukukikōléla fiki ikylene, ikupilikisya ukwisila mu kisasa, umwene alinkuséka ukufuma nkiboko kyāke, kangi umwene alinkuti, “Lilino, une, unkikulu unkangale mumo une njīlile, njege nubwīkyéle nu ntwā gwangu; kangi umwene nkangale, yópe, panja pala ifyinja mia yumo mbukusi? Akabalilo kāko, iki kibaboneka ku fyinja fingi, fingi.”

214 Kangi u Nnyambala, N-n-y-a-m-b-a-l-a, itugesye pala ikulya, mu mbili gwa būndu, ikunwa nukukya ngati nnyambala aligwesa; nu lufumbi pa myenda Gyāke, kangi u lufumbi pa malundi Gāke, kangi Abraham āsukile ulwene. Kyala, Mwene, alinkuketesya ukusyungutula, kangi Umwene alinkuti, “Ngimba fiki u Sarah asekile nukwilamwa, ayobile nkisasa *iki*?” Umwene

āmenye, ābagile ukumanya inyĩnogóno sya Sarah nkihema, kunyuma kwa Umwene. Ngimba uko kutalusya?

<sup>215</sup> Lilino, akabalilo káko u Luyungu Lwabunyafyale lwa Abraham lukwisa pa kĩsu, kyo kimanyilonki iku Umwene ānāngĩsyē? Mwanundumiana gwa mundu. Simoni alinkwisa ku Mwene i lisiku limo; Andrea alintwéle umwene. Umwene alinkuti, “Ingamu yako yugwe Simoni. Ugwe gwe mwanundumiana gwa Yonasi,” Umwene alinkuti. Muketile, kila kyāpēlile u mwitiki ukufuma mwa umwene.

<sup>216</sup> Filipu alinkubuka kula kangi nukummwaga Nataniele, nukugomoka. Alinkuti, “Isaga, kéta u Nnyambala Uyu uswe tu—uswe tummwāgile: Yeso gwa Nazareti, mwanundumiana gwa Yosefu.”

<sup>217</sup> Umwene alinkuti, “Lilino gũlila i miniti. Ngimba kwābagile akandu kamo a kanunu ukusōka ukufuma mu kyũmilisi kila?”

Umwene alinkuti, “Isaga, ukéte.”

<sup>218</sup> Polelo akabalilo káko u Filipu ikufika mu Kuyapo kwa Yeso, nu Nataniele, Yeso āketile ku mwene kangi alinkuti, “Kéta um’Israeli mwa uyu mukayamo ubugási.”

Umwene alinkuti, “Rabi, ngimba kabalilo kaki aka Ugwe gwalimnyemo une siku?”

<sup>219</sup> Alinkuti, “Bo Filipu akāli nukukukolela ugwe akabalilo kako ugwe gwāli pasi pa mpiki, Une nākubwene ugwe.”

<sup>220</sup> Umwene alinkuti, “Rabi, Ugwe gwe Mwanundumiana gwa KƳala. Ugwe gwe Mwalafyale gwa Israeli!”

<sup>221</sup> Akabalilo káko unkwikulu unnini yula pa kisiba, mu bwitugasye bwāke ubwabuhuni, ikwisa ikusegelela, ikindukimo pabwelu ikinini bo iki, ukunega a misi gamo. Yeso ātalile ābatumile abafundigwa Bāke, ukwakwega utwakulya. Akabalilo káko umwene ikwisa ukunega a misi, Umwene alinkuti, “Ndwalila Une agakunwa, nkikulu.”

<sup>222</sup> Umwene alinkuti, “Ikyene kikaya kyalwiho kwa Ugwe ukuyoba ikyo. Uswe tuli nukusalana kuno. Lilino, umwe ba kiYuda mukaya nakimo ikyakubomba na uswe ba kiSamaria; uswe tukaya nako nakamo akakubomba na umwe.”

<sup>223</sup> Umwene alinkuti, “Loli, nkikulu, linga ugwe gwāménye Uyu ugwe kuyoba nagwe, ugwe āngali kunsuma Une agakunwa. Une āngali ngupele une a misi ugwe utikulondigwa ukwisa apa ukunwa mma.”

<sup>224</sup> Umwene āpāgile pápo ubwitugasye bwāke bwāli, iki ikyene kyāli. Umwene alinkuti, “Buka kammwege u ndumego kangi isaga kuno.”

Umwene alinkuti, “Une nganun’dume na yumo.”



225 Umwene alinkuti, “Ugwe uyobile u bwanaloli. Ugwe gwáli nabo bahano, kangí yumoywene uyu kwitugasya nagwe akaya gwáko mma.”

226 Umwene alinkuti, “Nkulumba, une mmenye ukuti Ugwe gwe nsololi. Uswe tumenye akabalilo káko u Mesiya ikwisa Umwene isakunangisyaga uswe ifindu ifi.”

Yeso alinkuti, “Une ne Umwene.”

227 Pa ikyo, umwene alinkubopela nkaya nu kuyoba, “Isaga, kéta u Mundu Uyu ambuliile une ifindu ifi une mbombilemo. Ngimba uyu akaya yo Mesiya yulayula?”

228 Kêtesya, Umwene ábombile kila pankyeni pa ba kiYuda, kangí ba kiSamaria, loli siku ku Bāpanja. A Bāpanja, uswe twe bandu, twáli bipūtafiwáni mmasiku gala, ifikolo ifingi, tupimbile ikibundya pa nyuma yitu, ukwipūta ififwáni. Uswe tukálondesyága ku Mesiya nayumo.

229 Ukiboneka ku bala aba bikundondesya Umwene, kangí uswe tubagisenie ukundondesya Umwene.

230 Loli bala biyobélagá ukundondesya Umwene, i kipanga kyene, akabalilo káko abene bákétile kila kibombigwe, abene bātile, “Umwene yo mohesi yumo. Umwene ndagusi, u Belezebabu!”

231 Kangi Yeso alinkuti, “Ubutulwanongwa bula bukuhōbokeligwága ku bene,” panongwa yakuti Umwene akáfwile mma tasi. “Loli,” alinkuti, “ilisiku limo u Mbepo Mwikemo ikwisa nukubomba ikindu kilakila, kangí ukuyoba i lisyu limolyene ukulwana ni Kyene kitisa ukuhobokeligwa.” Ilyo lyo lisiku ili, kúko i Lisyu lililyosa likufimbilisigwa ukwipayika palikimo. “Ukuyoba i lisyu ukulwana ni Kyene; ikylene kitisakuhobokeligwámo siku nkisu iki pamo iki kikwisa.”

232 Ulo lwali Luyungu Lwabunyafyale lwa Abrahamu. Kangi apa lulinkwisa Luyungu Lwabunyafyale lwa Abraham, ulu lwálisile panongwa ya bwilinganio bula ubwa Nnyambala yula itugesye pala na Abraham, ukwisa ukusisimikisya ikylene áli u Kyala yulayula, ukufinda mu lisiku ili, “Mumo ukwene kwáyilile mmasiku ga Sodomu, momumo ukwene kwisa kuyíla mu kwisa kwa Mwanundumiana gwa munde, akabalilo kako Umwene ikwisetula Mwene ukuya Mwanundumiana gwa mundu.” Ameni. Ili lyo lisiku kuli Lisimbo ili ukusisimikisigwa.

233 Kéta ku buyo ubu uswe tulimo umwisyugu. Kéta ku kipanga kúko u Mwanundumiana gwa Kyala. . . Kéta ku lisiku lyangisi. Kéta ku busololi bosa. Lilino, ikindu ikihesya, abahesya bitu bafwene polelo, linga ubuyo bukayaga bo bwa ku Sodomu.

234 Balipo batatu ba abene bikwisa pala, abanyambala abakindane batatu batúmígwe ukufuma ku Mwanya. Uswe tusakwitikisya ikyo. Batatu ba abene; Yumoywene ásyéle na Abraham. Bosa bāsumwike ukufuma pala, loli Yumoywene

āsyéle na Abraham. Abangi ba bene balinkubuka ukusuluka ku Sodomu. Ngimba uko kutalusya? Kangi Abraham āli ni ngamu insanusigwe, ukufuma kwa Abram ukubuka ku Abraham. Kyabwanaloli?

<sup>235</sup> Komma nakabalilo nakamokene u syambukúlu, i kipanga ikya kīsu, siku bāli nu mbāngeli ukubuka ku kyene, ni ngamu iyi yikumalikisya nu h-a-m, mpaka ilisiku ili, Billy G-r-a-h-a-m. Ngimba uko ko kutalusya? G-r-a-h-a-m, amasimbo mahano na limo. A-b-r-a-h-a-m yo masimbo mahano-na-mabili. Loli G-r-a-h-a-m yo masimbo mahano-na-limolyene, iki kyo kisu, nnyambala. Muketile?

<sup>236</sup> Kéta iki kyābukile panja pala, umwisyugu, kyo bāndumi ukufuma ku Mwanya.

<sup>237</sup> Ngimba alipo u nnyambala pa kisu kyapási uyu alumbilíle ulupindiko bo ulo pabwelu fiyo bo yu Billy Graham? Ngimba ālipo u nnyambala uyu āli nubombabomba pa bandu, bo yu Billy Graham? Siku nayumo akālíko, nkisu kyosa, u nnyambala. O, Billy Sunday, na bosa bo abo, āli muno mu United States, loli u Billy Graham amanyikigwe ikisu kyosa. Kéta kúko umwene ikukōléla? Ukufuma mu Sodomu.

<sup>238</sup> Kangi umwene ali nu nnine ugwakumbikisya kula ni kipanga kya kiPentekosti, u Oral Roberts.

<sup>239</sup> Loli kyo kiliku ukufwana ni kibugutila i Kisaligwa? Ngimba kyo kimanyilonki abena bābagisénie ukukéta? Ngimba abene babāgisénie ukuya na kaki? Aleluya! “Kwisakuyaga u Bwelu nkabalilo ka namayolo.” I lisiku ili i Lisimbo ili līsīsīmīkīsīgwe. I lisiku ili u lufingo lwa Kyala lūsīsīmīkīsīgwe. Uswe tumenye ikyo ukuya Bwanaloli. Umwene ali apa ikilo iki bo Umwene āli akabalilo kala.

<sup>240</sup> Lilino, ukukilumbilila ikyene, iki une nāyobile akabalilo kanandi aka kakindilepo, linga ugwe kulumbilila kalikosa kangi ikyene kyo Bwanaloli bwa Nongwainunu, polelo Kyala ikufimbilisigwa ukusisimikisya kila. Ngimba ikyo kyabwanaloli? Lilino, linga ikyo kili bunobuno, unko u Kyala uyu āsimbili i Lisyu, unko u Kyala uyu āpelíle u busololu, unko u Kyala uyu yo Kyala gwa Lisyu, isega panja nukusisimikisya ukuti Umwene akāli yo Kyala.

<sup>241</sup> Bo mumo u Eliya āfyukíle pamwanya pa kyamba; ikukētésya, Elisha ābukíle ukunkētésya Eliya, umwene alinkuti, “Une ngulonda ikiyabo kabili-kosa.” Kangi ikikingo iki kyāli pa Eliya kilinkugwa pa Elisha. Umwene alinkusuluka pási, nukwikinga i bulangeti lila nukutika i kisōko, nukuyoba, “Ngimba alikugu u Kyala gwa Eliya?” Kangi i kindu kilakila iki kyāboníke kwa Eliya, kyāboníke kwa Elisha.

<sup>242</sup> Kangi i Nongwainunu yilayila, a Maka galagala, u Mwanundumiana gwa mundu yulayula uyu āli mmayolo, yo ali umwisyugu, kangi ikuyaga bwilanabwila. Abahiburi 13:8.

Ngimba umwe mukwitika ukuti Ikyene? [Ikilundilo kikuyoba, “Ameni.”—Nsimbi.] Polelo, une ngusuma. Une ngabagila ukuya Umwene, loli Umwene ali apa. Uswe twe kyakupimbilamo itolo.

243 Mwe bamo mwa bandu panja pala, aba bo babine nukukomeligwe pasi, mwe mumenye ukuti une ngabamanya umwe, unko Kyala lilino...linga une mbagile ukwiyufya nimwene ukufwana. Ugwe ipúta nukunsuma Kyala.

244 Une ndikusakikisya mma...Yikayapo ni kadi ya lwiputo nayimo nkiyumba, ngimba yilipo? Umma, une ndiku...Uswe tukâyabánia a makadi ga lwipúto mma. Uswe tukuyaga nu lukomano lwa lwípúto ku...pamo ukubumbulusya kwa babine, ku kipanga. Loli, umwe ipúta.

245 Kangi umwe mumenye ukuti une nhesya mosa kwa ugwe. Muketile, umwe mumenye une, Jeffersonville! Une ndikulonda a bandu ukufuma ku Jeffersonville ukubomba ikyo. Une ngulonda a bandu aba bikufumila kuno ku buyo bumo. Ukukéta linga Kyala akáli ikusetula! Muketile linga Umwene akáli yo yuyo mmayolo, umwisyugu, na bwilanabwila!

246 Bomba mumo u nkikulu unnini ábombíle. Umwene ákindilemo, kangi umwene alinkuti, “Une ngumwitika u Nnyambala uyu.” Umwene áli nu kusulula kwa lilopa, kangi umwene alinkuti, “Linga une mbagile ukupalamasya ulugenge lwa mwenda Gwáke, une ngwitika une nguyaga kanunu.” Ngimba uko ko kotalusya?

247 Panongwa ya lwitiko lwake, i lisiku lila, i Lisimbo lyásisimikisígwe. “Umwene alinkufunga i ndumbula ya mbongotoka ndumbula, ukubumbulusya ababine na balemafu.”

248 Akabalilo kako umwene apalamásyége umwenda Gwáke, kangi alinkusyumbutuka nukuketa pasi, Umwene alinkusyumbutuka nukuyoba, “Ywani ambalamásisye Une?” Ngimba Umwene abagile ukumanyamo bulebule, nkilundilo ikikulumba ikya bandu kila, lumo ukwandania malongo-matatu kya iki kili apa ikilo iki, aba elifu ba bene? Ngimba Umwene ámenye bulebule ikylene? Umwene alinkuti, “Ywani ambalamásisye Une?” Umwene akâyobíle kila kukuyoba itolo mma; Umwene áyobíle kila panongwa yakuti ikylene kyáli kyabwanaloli. Kangi Umwene alinkuti, “Ywani ambalamásisye Une?” Kangi nukutalula Umwene alinkukéta ukusyungutila nukumbona u nkikulu unnini, kúko umwene álitugesye pamo álimíle, kali umwene álitugesye bulebule, ukumbula umwene ukusulula kwa lilopa lyáke kwámalíke.

249 Yula áli Yeso mmayolo. Yula yo Mwene umwisyugu. Ngimba mukwitika ikyo?

250 Une ngakumanya ugwe; Kyala ikukumanya. Loli ugwe guli nu bubabe ndubafu lwáko, ubu bukukutamia ugwe. Uko ko kotalusya. Ugwe gwitugesye pala kwípúta isya ikylene.

Ngimba une ne nhesya kwa ugwe, kangi uswe twe bahesya yumo ku nnine? Ima mmwanya, linga ikye kyo kili. Une ngakumanya ugwe. Umwene yo nnyambala *uyu* papapa apa pa nguto, u mwinitu unkeke uyu. Ugwe nugwe uli na pammilo pabibi. Uko ko kotalusya. Ugwe kwiputal ukufwana na ikyo. Ugwe guli nulutende mosa ukufwana ni kindikimo. Ugwe kubukaga ukusökamo ndukomano panongwa yakuti, ugwe gwe ndumbilili, ugwe guli nasyo ifingo ugwe kufimbilisigwa ukupakikisya. Uko ko kotalusya. Uu-huu. Ugwe kwitika Kyala amenye ugwe gwe ywani? Rev. Tata. Smith, lilino ugwe ubagile ukubuka nukubumbulusigwa. Yeso Kristi akupelile ugwe uyege kanunu. Bukaga kula ku lukomano lwäko; ummilo gwako gutikukutamiaga ugwe mma.

Ngima ywani umwene ämpalamäsísye?

<sup>251</sup> Alipo u nnyambala itugesye kulakula ku nyuma *apa*; umwene ikukubilwa. Umwene ali ni lyilu pa lipapo lyäke lyäkukimäma. Umwene atiku. . . Umwene akaya gwa kuno mma. Ugwe gwäbombaga imbombo mu migodi. Uko ko kotalusya. Une ne nhesya kubumalikisyo kwa ugwe. Linga ikyo ko kotalusya, fyusya i kiboko kyäko. Ilyilu lili pa lipapo lyäko ilyäkukimäma, kangi ugwe gwitendekisye kuli bupanje lululu ulu. Uko ko kotalusya? Ugwe ukaya gwa kuno mma. Ugwe ufumile panja pa käya. Ugwe kufuma ku Virginia. Uko ko kotalusya. Ugwe kwitika Kyala akumenye ugwe ukuti yuwe ywani? Tata. Mitchell, uko ko kotalusya, bukago ku käya nukuya kanunu. Yeso Kristi ikukupela ugwe uyege kanunu. Ndalusya u nnyambala! Ngambonamo siku umwene, mbumi bwangu. Umwene älitügésye pala, ikwipüta.

Ilisiku ili i Lisimbo ili!

<sup>252</sup> Apa alipo unkikulu itugesye panyuma apa, kunyuma kwa une, mumo Sarah äli nkihema. Umwene ikummwiputüla u mwana gwake undindwana. Ima mmwanya. U mwanundindwana akaya apa mma; umwene asökilepo, u mwanundindwan. Kangi ugwe guli itolo lulalula mumo iyene kyäli akabalilo käko u nkikulu älisile kwa Yeso, uyu äli nu nkikulu uyu ätamigwe nubukindanekindane nu nsyétano gumo. U nkikulu yo. . . undindwana isusigwe ni misyétano. Umwene akaya apa mma. Umwene ikufumila. . . Ugwe kufuma ku North Carolina. Ugwe kwitika ikyo? Kangi ikyo kyo bwanaloli, bule ikylene? Nka. Orders, ugwe ubagile ukubuka ku käya. Linga ugwe kwisakwitika ni ndumbula yako yosa, ugwe kwisakummwaga u mwanundindwana gwako mumo ägigwe akabalilo käko u Yeso Kristi mmasiku aga gakindile, lyäyobile umwene äbumbulusigwe.

<sup>253</sup> I lisiku ili i Lisimbo ili; ikimanyilo kya Sodomu, ikimanyila kya Luyungu lwa pamwanya, ikimanyilo kya kipanga

ikyankipeligwa! I lisiku ili i Lisimbo ili lisisimikisígwe nkati myitu. Ngimba umwe mukwitika icyene?

<sup>254</sup> Ngimba umwe mwisakwitikisya Umwene lululu lino ukuya Mpoki nu Mbumbulusyi gwinu? Ima mmwanya pa malundi ginu, aligwesa gwa umwe, yoba, “Une ngwitikisya ububumbulusyo bwangu. Une ngwitikisya Umwene ukuya Mpoki gwāngu. Une ngwitikisya Umwene ukuya Mwalafyale gwāngu.” Aligwesa ima pa malundi ginu.


Ilisiku ili! Pilikisya, mwebinangu.

<sup>255</sup> “Umwene ikubala i Lisimbo, ukubika i Bangeli ukugomokesya ku mpūti, kangi,” alinkuti, “amaso hosa aga bandu galyumilisigwe pa Mwene. Kangi Umwene alinkukéta ku bene, nukuyoba, ‘Ilisiku ili i Lisimbo ili lisisimikisígwe.’”

<sup>256</sup> Une mbalíle i Lisimbo lila, nu buketi kalaongo na bubili pamo ukongelelápo ukuti uswe tukwitugasya mmasiku gabumalikisyo, i ngulilo iyi yisakunkéta Yeso Kristi ikugomokela ku kisu. Kangi une nguyoba kwa umwe ikilo iki, kangi, i lisiku ili i Lisimbo ili lisisimikisígwa mmaso ginu.

<sup>257</sup> Umwe mu Tucson, umwe mu California, umwe mu New York, mbulunganisyo bwa ma telefoni aga, i lisiku ili i Lisimbo ili lisisimikisígwe pa maso ginu.

<sup>258</sup> Unko uswe tuyega basangaluke nukuya bahobofu, kabuno u Bwegi bwa Kang’osi buli kifuki, kangi u Nsingilígwa Gwāke . . . u Nsingilígwa Gwāke itendekisye Mwene.

<sup>259</sup> Unko uswe tufyusye ifiboko fyitu nukumpa Umwene ulwimiko, mwesa mwa bandu umwe. Kyala abasaye umwe. 

*ILISÍKU ILI I LISÍMBO ILI LISISIMIKISÍGWE* KYA65-0219

(This Day This Scripture Is Fulfilled)

Ubulumbilili ubu butwaligwe nu Nkundwe William Marrion Branham, ubu pakwanda bwatwaligwe nki Ngereza pa Kihano namayolo, Februari 19, 1965, ku Parkview Junior High School mu Jeffersonville, Indiana, U.S.A., bwegigwe pa busimbe bwa tepi ya magneto kangi busimbigwe kisitakutumula mu ki Ngereza. Ukusimba ukwa mu Kyangonde ubu bwasanusigwe nu kuyabanisigwa na ba Voice of God Recordings.

KYANGONDE

©2022 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Ukusasania isya kwegwelelakwegelela

Ukusoka isya kwegwelelakwegelela. Ubwabuke bosa bukanisigwe. Ilibuku ili libagile ukubindikisigwa mfikalatasi pa kompyuta ya kunyumba ukuti ufibombelege imbombo yuyugwe pamo ukubayabilako abangi, kisita kuhombigwa, fiyege fyombo fyakubombela imbombo pakusasania Inongwa inunu isya Yeso Kristi. Ilibuku ili likabagila ukuulisigwa, pamo ukubindigwa ukuti gayege mingimingi, pamo ukusanusigwa pa webusaiti, pamo ukubikigwa mmakina agakusungasunga, pamo ukusanusigwa mu ndimi isingi, pamo ukulibombela imbombo iyakusyagilamo ihela kisita kwitikisigwa mwakalata unsimbigwe ugwa Voice Of God Recordings®.

Linga kulonda upilike inyingi pamo ifyombo ifingi ifi filipo ulisimbilaga ku:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)